


KUVÛLUKA MUKALENGE

 Twasàkidila. Mukalenge àkubènèshè, mwanèètù wa balùme. Ndi nè disanka dya kwikala mwab'ewu, dilòòlò edi, mu Assemblées de Dieu ya ku luseke lwà Sud, bwà kukuukwila pàmwè neenù, kusànkila bwobùmwe bulenga ebu bunùdi nusànkila dîbà dyònsò kakùyì mpatà to.

² Ndi ànu mucyòke ndambù. Tuvwa ku—ku Tucson makèèlèlè dilòòlò awu, bwà didyà dyà mikùùkùkù kuntwaku, nè ncyà bushùwà nè tuvwa bapicile ci—cikondo cilenga cyà dikèma. Mukalenge kutùbènesha. Nènku mvwa mushààle nsànkila bwîmpè bwàcì, ditùkù dijimà.

³ Nànku, mpindyewu, mèmè kutwilangana, kuumvwa muntu kampàndà makèèlèlè dilòòlò awu. Ncìvwakù mumanyè mwànà wa balùme wa Mwanèètù Carl Williams to. Mvwa, leelù ewu, ànu ntwa nsongàalùme kampàndà awu makùmbu uvwa mujuuke nè mwakùle bwà di—didisanga dyà bansòngà awu. Ke mèmè kwambila mwanàanyi wa bakàjì. Mèmè nè: “Mpindyewu, ucìvwije bwalu bwèbè wèwè bwà kubwelamù.”

Yèyè nè: “Ncyèna mumanyè muntu nànsha umwe muntwamu to.”

⁴ Mèmè nè: “Neùmanyè muntu kampàndà, anyi muntu yònsò neàkumanyè. Bwelà wèwè ànu dibwela, mwine’s.”

⁵ Nènku ndi nsambila bwà àpetè dibàtiiza dyà Nyumà Mwîmpè mu didisangisha edi kuntwaku.

⁶ Mèmè nè: “Nsongàalùmè mulenga wàwa mwimàne mwaba awu, nè mpàla wendè ùbàlakana nè butumbi bwà Nzambi!” Nènku mvwa munkacì mwà kucyàmbulwila Billy.

⁷ Kwimanayè ànu cyanàànà e kuntàngilayè, wàmba nè: “Papa, kwèna mumanyè nè awu ùvwa nganyi anyi?” Yèyè nè: “Ùvwa mmwànà wa balùme wa Mwanèètù Carl Williams.”

⁸ Èè, aci, ndi—ndi mumanyè nè udi mufùmìne ku mudibu mwîmpè. Pawikalà . . . Nwamònu anyi?

Ndi nè disànkà dyàbùngì dyà kwikala mu Phoenix dilòòlò edi.

⁹ Èè, wàwa ní kî m’Mwanèètù Pat Tyler. Udi mufùmìne penyì pa buloba, mwanèètù? Ngèèla meeji nè ùvwa wènda ùlòmba beena màshinyì bwà kumwambulabò, kuumukila ànu ku New York too nè apa. Bidi ànu bu nè ke mùtùbì’s.

¹⁰ Ndi mvùluka nè mvwa mumòne Mwanèètù Gene, Mwanèètù Leo, kaaba aka dilòòlò edi, Mwanèètù Ed Daulton, bààbùngì bàà ku balundà bàanyi bàdi kaaba aka aba, nè Mwanèètù Ed Hooper.

Nènku, ekèlekèle, lwà kuulu eku dilòòlò edi ndi nè mmwènu muwimpè wa bantu bônso, nè ndi mwà kukènzakana, mbimpè.

¹¹ Èè, ndi munkaci mwà kwenda kudyumvwa mucyòke ndambu mukesè. Mvwa mukolèshe ànu menemene, nènku ki twètù kwikala—kwikala . . . mukùngùlù mule wà mèbà. Ke mèmè . . . Mukàjàanyi kwambayè nè: “Amba tǔng, ndi mmòna nè udi mubange kwakwila mu dīyī dyèbè diibīdī.”

Mèmè nè: “Bìvwa bìkèngela ndyǎngate musangu ewu.”

¹² Misangu mikwàbò pàndi ngàakula, ndi mpweka, ngàakwila bikolè pa muminu, pashiishe citùpà aci cidi citàpika nè cicyòka. Ndi mbàndisha, lwà kuulu, nè ngaakwilakù, mùshindù awu. Tudi ànu nè cyà kuyiila bintu byà mishindù yònsò patùdi ànu munkaci mwà kukwàcila Mukalenge mudimu, kī mmwòmò anyi, patùdi bazengèle?

¹³ Nènku, ekèlekèle, ndi ntèkemena nè bônso aba mbambi bàdi lwà paanyimà apa. Byòbì nànkù, ekèlekèle, tudi banyungulukila ànu bimpè dilòòlò edi, musumbà melenga wà bantu bàdi basòmbe pàmwè. Èè, aci's cidi cimvùlwija mulayi, wà nè: “Tudi basòmbe pàmwè mu myaba yà mu Dyulu, mu Kilistò Yesù,” mùdì Mashi Èndè àtùkezula ku mpèkaatù yònsò.

¹⁴ Mpindyewu nēnteetè, bulelèlè, bwà kunùpàtula kumpàlà kwà dībà dilòòlò edi. Kuvùluka mpindyewu nè, màalabà dilòòlò, netwikalè kwà Mwanèètù Shores kwàka. Ke dīnà dyèndè anyi? [Mwanèètù wa balùme kampàndà udi wamba nè: “Ncyà bushùwà.”—Muf.] Mwanèètù Shores, mu disangu dyà mùsèèsù wà Dikùmi nè ùmwè nè wà Garfield. Ke Assemblée de Dieu mukwàbò nyèyè awu mwaba awu. Èyowà. Assemblée de Dieu lwà kuntwaku, nè Assemblée de Dieu wa Kumpàlà.

¹⁵ Nè pashiishe nēngiikalè ànu nè cyà kutèeleja bakwètù bakwàbò aba bwà katanci mpindyewu, too nè ku dyàlumingu didi dilonda mu dīndà, Ndi ncinka nè, lwà ku mpungilu kwàka. Ndi . . . Netùpicile mu cikondo cyà dicyònkómoka cilenga be. Ndi ndyùmva ànu nè netùpicile mu cikondo cimpè be.

¹⁶ Nènku kiipàcilà kàanyi kàà kwikala kaaba aka kàdi mu mùshindù kampàndà, kàà, mu mùshindù kampàndà kutwishangana cyanza, nudi bamanyè's, ntwà eku nè eku bwà kukwàcishangana mwaba wònsò, nè kwenza bwobùmwè bukesè nè bāna bèètù, nè kupicisha dilòòlò kampàndà eku nè kwàka, bwà kumanyangana. Nènku—nènku pàmwàpa nyumà mukesè wa ditàbuluja ùbanga kulenga bantu, nè pashiishe kwenza nè cyòci aci cilombolè, citùdiku mwà kwenza, mwòmò amu, nè pashiishe kufika mu katòngòbèlè kanène amu. Nènku ndi ngèela meeji nè, Mwanèètù Oral Roberts ke muntu mu cikondo eci udi nè cyà kutufikisha mu katòngòbèlè ku didyà dyà mikùùkùkù mu dīmwe dilwalwà edi dilòòlò. Nènku ndi mumanye nè tudi munkaci mwà kwindila cikondo cinène cyà dicyònkómoka, nè mu matùkù ónsò à lumingu àdi mashààle aa.

17 Pa nàнку nwatùsambidilaayi mpindyewu, nè kupatuka mu mìsèèsù, mu mpangu nè mu bibeeba. Kàdi “kubàlòmba” anyi? To. “Kubènzeja.” Kubènzeja, kubènzeja bwà kubwelabò. Bwalu eci ncifwànyine kwikala cikondo cilenga be bwà Phoenix kupeta dikùmbula dyèndè dinène dinùdi. . . Nè ndi mumanyè nè Nzambi mmuswè patùdi badilongòlòle, èyowà’s, mukalenge, patùdi badilongòlòle. Twànjibi. . . Ke bwà cinyi tudi. . . matàbuluja aa àdiku, mbwà kuteeta bwà kukùmbaja mishìngà yònsò, nè kwikala mu disambila, nè kudilongolola bwà cintu eci kwenzekaci.

18 Mpindyewu, ànu kumpalà mene kwà twètù kuseemena ku Diyì, twànjààyibi kwakula nè Mwenadi, patùdi twinyika mitù yetù mu disambila apa. Mpindyewu nè mitù yetù nè myoyi miinyika kùdi Nzambi, ndi mutwishiiibwe nè, mu batèèleji búngì nùнку, kùdi nè cyà kwikala malòmba àbúngì. Nènku wèwè naadi, nè muswè bwà bàkuvùlùkè kùdi Nzambi, elà ànu cianza cyèbè muulu cyanààna, nè paanyimà pàa cyòci aci, wamba nè: “Mukalenge, wamvùlukakù.”

19 Taatù wetù wa mu Dyulu, Wèwè ngudi mumanyè cidi paanyimà pàa cyònsò cyà ku byanza ebi. Udi mumanye cidi cipite mu meeji àbò, nè Wèwè udi mutàmbe nè kukùmbana bwà kwandamuna dilòmba dyònsò. Nènku tudi tulòmba bwà Wèwè kucyènga, Mukalenge. Tudi tulòmba bwà dyèsè Dyèbè ditusekèlèkù, dilòlò edi, mu mùshindù wà dipòngolodiibwa dyà Nyumà Mwimpè pambidi pèètù.

20 Nè kuvùluka, Mukalenge, nè, màalabà dilòlò mu—mu Assemblée de Dieu wa Kumpalà amu, nè Wèwè nèupòngololè cyàkàbìdi mabènesha Èbè pambidi pèètù. Nè pashiishe ku Ramada kwàka, dijikija dyà lumingu, Èyi Nzambi wa yààya, swàkù bwà kwikalè nkàmà yà bantu ànu yetù yà cyà bushùwà eyi misùngidiibwe. Enzàku nàнку, Mukalenge. Kwikalèku dipòngoloka dyà Nyumà mu mùshindù—mu mùshindù wà nè bibejibeji kabìyi mwà kushàala bipùwe kàbìdi to, kàdi nebikèngelè bwà kumanyishabi bantu bònsò cidi munkaci mwà kwenjiibwa aci. Enzàku nàнку, Mukalenge.

21 Dimanyisheku ànu kùdi cisàmbà Cyèbè, Mukalenge. Swàkù bwà myoyi yàbò mipwekèle yifike ku diitabuuja nè yitabuuje nè netwàkidilè bintu bitùdi tulòmba ebi.

22 Dìbà adi tudi baswè kulòmba, Mukalenge, bwà aba bàdi baswè kwikala kaaba aka dilòlò edi kàdi kabàyikù mwà kukùmbana mwà kufika kaaba aka to. Bàdi bàsaama nè biikàle mu ntàtu, nè—nè mu ngiikàdilù yà kabàyiku mwà kufika mwab’ewu to. Tudi tubàsambila, Mukalenge. Nyumà Mwimpè àmwènekelèku muntu nè muntu yònsò.

23 Bèneshakù bânà bèètù bàdi bafùmìne mu ntàntà mule be bapicile mu madimi à mabwe à mashikà aba. Nè bààbúngì bàcidi

mu njila, bènda bàlwa. Bàkùbèku, Mukalenge. Bàfikishekù mu dikùbiibwa dyònsò.

²⁴ Mpindyewu, bèneshàku Disangisha edi, mpaasàtà mulenga ewu, disangisha dyèndè, balubuludi bèndè, balami, nè byònsò bìdìbò bàtwà nyama ku mikòlò abi, Mukalenge. Tudi tulòmba bwà Wèwè kwikala naabò nè kubàkwàcisha. Mpindyewu tudi tulòmba bwà Wèwè kutùpèèsha Dìyì Dyèbè. Tudi ànu mwà kuDìbala cyanaàna, Mukalenge, nè kubala cyena-bwalu. Wèwè ngudi nè cyà kufila dyumvwija, nè tudi baKwindile. Mu Dìna dyà Yesù Kilistò. Amen.

²⁵ Mu—mu mukàndà wà Kolintò wa Kumpàlà, nshapità wa 11. Muntu yèyè...Nudi bamanyè's, pa ciibidilu nutu baswè kubala, anyi kufùnda mwaba kampàndà, kwamba nè: "Ndi..." Pàmwàpa muntu kampàndà mmuswè kupeta cintu kampàndà paanyimà pààci cidìye pàmwàpa mwà kukùmbaja pa cikaavwà cimana kwamba. Anyi bambi, nè mîngà misangu beena kwitabuuja bàà pàtupù, bàdi bàcyàngata nè—nè bàcibala cyònsò, nè bàtèèleja cikaavwa cimana kwamba. Misangu yàbùngì ntu ngèza nàнку, kufùnda cyena-bwalu. Pa nàнку nwènu baswè kutùlondesha mu dibala dilòlò edi, buulùlaayi mu Kolintò wa Kumpàlà, nshapità wa 11, nènkù netùbangilè kubala ku mvensà wa 23.

Bwalu ndi mupetè kùdì Mukalenge cìndi pàànyi munùtwàdile: Nè Mukalenge Yesù mu bufùkù bùmwebùmwe...bwàkamutungilàbo abu wàkangata dyàmpà:

Nènkù pààkamanàye kusàkidila, wàkadìcibula, nè kwambayè nè: Angàtaayi, dyàyi: eci mmubidi wànyi, wùdì mucibùdìibwe bwà bwalu bwènu: nwìkalàayi nwenza nùnkù bwà kumvùluka.

Byà mwomùmwe kàbìdì paanyimà yèyè wàkangata lupànzà, nè pààkamanàye kudyà didyà dyà dilòlò, kwamba nè: Eci cidì lupànzà lwà cipungidì cipyacipyà mu mashi àanyi: nwìkalàayi nwenza nùnkù, misangu yònsò yinwàlùnwa, bwà kumvùluka.

²⁶ Nènkù mpindyewu bwà cyena-bwalu, ndi muswè kwangacila mwaba awu: *Kuvùluka Mukalenge.*

²⁷ Mpindyewu, mu bushùwà bwà bwalu, muntu kanà yònsò, tudi bamanyè bònsò, mu—mu èkéleeziyà wetù nè, tutu tubala cyòci eci ku mudimu wà Mèèsà à Mukalenge dilòlò dyònsò. Nènkù ncyena-bwalu cinènè cyà—cyà—cyà dibala, anyi Mufùndu munènè pa dìbà adi, nè cidì cyàngaciibwa mwaba awu. Kàdi mvwa muswè ànu méyì awu nè: "Bwà kuMvùluka."

²⁸ Mpindyewu, Mèèsà à Mukalenge àtu misangu yàbùngì menzela makòkyanganyi manènè munda mwà bikondo byònsò, pankaci pàà beena Mishònyì nè beena Kàtòlikè. Bàdi bàmba nè beena Kàtòlikè bàdi bàngata mèèsà à Mukalenge aa, nè

bààngata mu ditèkemena dyà nè mbênzè cintu kampàndà bwà kukumbanyinaku cintu kampàndà cimpè, bwà nè mpèkaatu yàbò yàfwidiibwakù luse mu dyenza nàнку. Beena Mishònyì bàdi bààngata bu civùlukilu cyà nè Kilstò ùkaadi mumanè kubàfwila luse, nè bàdi bààngata mu dicyònkomoka dyà nè bàkaadi bamanè kufwidiibwa luse.

²⁹ Pòlò mmutùngùnùke nè kwamba kaaba aka, nè—nè, mùshindù wà kulwa ku mèèsà à Mukalenge. Kwòkò kwikale cintu cibi, cìlongòlòlè kumpàlà kwà twètù kufikakù. “Bwalu ewu udi udyà nè ùnwa kàyì mukùmbànyine to, ùdyadya nè ùnwanwa dipiila dyèndè yèyè mwinè, kàyì ùjingulula mubidi wà Mukalenge to.” Nènku mpindyewu tudi menemene, ànu menemene nè cyà kwikala mu disambila patùdì twangata Mèèsà à Mukalenge.

³⁰ Kàdi nkàadi mudikonkèkònke misangu yàbùngì, mwàkù awu, ní tudi tukwàta naawù mudimu mu wòwò menemene, mèèsà à Mukalenge. Mpindyewu, *kwenza bwobùmwe* mbwena kwamba nè “kuyiikila nè,” nwamònu’s, “kwenza bwobùmwe nè.” Nènku ndi ndikonka ní kì mbulelèlè nè, patùdì tutwilangana mùshindù ewu mu myaba yà mu Dyulu, aci ní kì mbwobùmwe, bwà nè tudi tuyiikilangana nè Nzambì, twakula Nèndè.

³¹ Nènku, díbà adi, bu twètù ànu mwà kushààla bapùwe nè kuMulekela ùtwàdamuna’s! Bintu byàbùngì, nè cìmwè cyà ku bintu bibì bitàmbe bìntù ngenza, ntu nteeta kwenza dyakula dyònsò nkààyani, kàdi—kàdi nciyi nshààla musòmbe mupùwe ntàntà bule kùmbàne bwà Yèyè kungandamuna to. Tutu twenza nàнку misangu yàbùngì mu disambila. Ndi ngèèla meeji nè bu twètù mwà kulòpola mu mwoyi wètù cìdì munda mwàwù aci, nè kucileeja patòoke kùdì Mukalenge Yesù, nè pashiishe kutwà ànu binù, nè kushààla bapùwe ànu katanci kakesè nè— nè kumòna ànu cìdìYe mufwànyine kutwàdamuna. Nwamònu anyi?

³² Nènku míngà misangu ntu mwenze nàнку, nè mmwènenu wanyì yònsò nkòong wakashintuluka, nudi numòna’s. Mwawa mwà kuya kaMukonka cintu kampàndà nè: “Mpindyewu, Mukalenge, bantu aba, mu bulelèlè, bàdi nè cintu kampàndà. Ndi—ndi ngèèla meeji nè bàdi naanyì dijinga kuntu kwàka.” Nènku mwawa mufwànyine kutwàdija ànu kusambila, kàdi katanci aka anyi, pàanyi—pàanyi ànu musànkishiibwe nè ndiswa dyà Mukalenge; kàdi, paanyimà pàa mèmè mumanè kusambila, bu mèmè ànu—ànu mwà kunèngakù ndambù mukesè, nwamònu’s, díbà adi ncishintùlùdiibwe, cyònsò mu kaabujimà, míngà misangu, ùntùma mwaba kampàndà mukwàbò. Kuyiikilangana ànu nè Mukalenge. Kaa, bwobùmwe kaayi bwà butùmbi’s wè, ànu bwà kuya kayiikila, nè kwenza bwobùmwe, nè kwindila bwà Yèyè kwandamuna.

³³ Nènku pa kwela meeji ku Mupèrsònà munène ùdì wakula

Nendè ewu, Mufùki Yèyè mwinè, nè kuyiikilangana Nendè Yèyè wàkatèèka mwoyi wèbè mu butù bwà volcan mùdi musòmbèle amu abu. Nè pashiishe dîngà ditùkù nebikèngele bwà wèwè kuumukamù, nè dîbà adi kwàyà mwoyi wèbè kwangacila apu kùdi mu byanza Byèndè. Nè udi nè dyèsè mpindyewu bwà kwenza disungula dyèbè dyà njila walonda musùùkà awu pùùmukàwu.

³⁴ Kàdi ncintu kaayi cilenga cilaya bwà kuyiikila Nendè bashindàmèene pa milayi Yèndè, pashiishe kuMuumvwa ùkwandamuna, wamba nè: “Byònsò mbîmpè.” Ekèlekèle, aci—aci’s cidi cyà bushùwà cicyàmba patòoke mu cyòci. Kabyèna bikèngela bwà twètù kutàngila twitabàayi kampàndà to. Kabyèna bikèngela bwà twètù kutàngila ku—ku mēyi maswika kampàndà to. Cintu cimwèpelè cidi cikèngela twètù kwenza nkumanya ànu cyanààna nè Yèyè ùdi ùfidila Diyì Dyèndè bujaadiki, bwà nè ncikosè bwalu, nè ke cyònsò cidìku bwàci aci. Pashiishe bujitu bùdi bùùmuka.

³⁵ Ndi mwele meeji bwà kulwa ku mèèsà aa, mutùdi tuàbìikila dilòòlò edi, bu mungààmanyi kucyàmba patòoke mpindyewu nè cidi mèèsà à Mukalenge mwab’ewu ànu mùvwàbi bifwànyine kwikala kwangata kwà citùdi tubiikila nè didyà dyà dilòòlò dyà Mukalenge aci.

³⁶ Nudi bamanyè’s, bantu bàà ku esètè kuntwaku abu mbasopàkàje cintu aci, nènku—nènku ncyèna mwà kubàlongolola pa bwalu abu to. Nènku kwàka ku nord, bàyaaya naanyi dîbà dyà kuya ku didyà dyà dilòòlò, nè bamba nè ndidyà dyà mundaamuunyà. Ndi—ndi . . . Bàdi bamba nè ndidyà dyà mu dindà, nè didyà dyà mundaamuunyà, nè—nè—nè—nè didyà dyà mundaamuunyà. Mpindyewu, didyà dyànyì dyà dilòòlò didi dilwila penyì? Ndi nteeta bwà kujandula. Nwamònu anyì? Nènku bàdi bamba nè: “Kaa, s’kwàjiki.”

³⁷ Mémè nè: “Kàdi kabivwa nàнку to, katùvwa badyè didyà dyà mundaamuunyà dyà Mukalenge to. Yèyè ngwakadibìikila didyà dyà dilòòlò, didyà dyà dilòòlò dyà Mukalenge.” Kàdi ndi ndyùmvwà ànu bu nè nkumpangike didyà dimwè, wèwè mucibìikile, mubangè kucibìikila mùshindù awu.

³⁸ Kàdi mpindyewu patùdi tudisangisha mùshindù ewu, ke Nzambì udi upweka awu. Nènku Mèèsà à—à Mukalenge àdi bulelèlè nkucibula, mibidi micìbulula . . . mubidi wà Mukalenge wutùdi twabanyangana munkaci mwètù. Mpindyewu, aci’s ke mubidi mwena diinà, wà—wà dyàmpà ditùdi tucibula edi, wùleeja Mubidi wà Kilistò.

³⁹ Nuvwaku bamòne mu Ditùkù dyà Mpenta, nè ncintu cinène kaayi citùdi naaci kuntwaku? Bwà nè, Nzambì, Yèyè wàkalombola bàna bàà Izalèlèlè mu cipèèlè awu, Yèyè, Dikunji dinène dyà Kapyà adi, nènku mu Ditùkù dyà Mpenta, Kapyà kanène aka kàakapòna, nè pashiishe kuDyàbanya munkaci mwà

bantu Bèndè. Kaa, pa kwela meeji mùshindù wùdìYe muswè bwà twètù kusòmba pàmwè mu myaba yà mu Dyulu, díbà adi, muntu nè muntu ùsànkila luuyà lwà Kapyà kàà Nyumà Mwímpè alu. “Ndimì mipandùlùke yàkasòmba pamutù pààbò bu Kapyà, ndimì ya Kapyà,” Nzambi munkaci mwà kuDyàbanya munkaci mwa Èkèleeziyà. Kaa, aci kî ncifwànyineku, nànsha nànkù, kulàkusha ànu myoyi yètù nè kapyà. Apu’s ke patùdì mwà kudisanga mu myaba yà mu Dyulu.

⁴⁰ Mpindyewu, tudi bamanyè nè mèèsà Èndè, mùdì bantu basòmbè pàmwè nè bàyiikila Nendè, mbyenzè bu mwaba wà màyi wà mu cipèèlà. Nènku mwaba wà màyi wà mu cipèèlà, mu cipèèlà wà mu mùdì musulù munène, mùdì beena lwendu bazengèle bálwa nè bàsòmba banyungùlùkile dijiba dyà màyi edi mu cipèèlà, nè—nè kupeta cyashima, nè díbà adi kuvùluka mwàkafikàbu kuntwaku.

⁴¹ Nènku mùshindù awu ngùdìbi mu Èkèleeziyà, nè, mèèsà à Mukalenge aa mùdì mabènesha ònsò à Nzambi, Èvànjeeliyò mu kaabujimà, byònsò bìdì naabi Nzambi bwà Èkèleeziyà Wendè, mbipàtula, bitèeka munkaci mwètù. Nènku ncyenzè ànu bu—bu mwaba wà màyi wà mu cipèèlà cyà luuyà lukolè, cyà cilàkuka kapyà, cyà mpèkaatù citùdì munkaci mwà kupicilamù eci. Nè pashiishe patùdì tubwelamù, nè tuyiikila, tubala cikèbelu aci, nè pashiishe tudi tumòna nè Ùdì ùkùdimuka, nè Yèyè kî ngùcipàtukilakù mu *cikampàndà*, anyi ùcipàtukilakù mu *cikansanga*, anyi muumùshe *cikampàndà*, kàdì Yèyè ùdì umwèumwè awu makèèlèlè, leelù, too nè kashidi. Yèyè’s ùdì nè bintu byònsò pa cikèbelu, mudìlongòlola bwà kubyàbanya. Aci’s ke luseke lwímpè. Díbà adi tudi ànu mwà kwosha dísu ku cikèbelu aci nè kwangata cintu cyònsò nkòng. Ntu ànu muswè bwà kucyàngata, ntu muswè cintu aci mu kaabujimà, kî mmwòmò anyi? Ntu muswè ànu kucyàngata.

⁴² Nènku patùdì tusànkila mabènesha aa, muntu yònsò munkaci mwà kuumvwa Bwikadi Bwèndè, nè wàmba nè: “Amen. Nzambi àtumbè! Àlèluuyàh!” nè bikwàbò, mu cyòci aci tudi mwà kuvùluka Ewu wakatùtwàdilabi nè kubivwija byà bipeteka awu, lufù lwà Mukalenge Yesù Kilistò, Mwànà wa Nzambi. KuMuvùluka. Ndi ngèèla meeji nè ke cìdì, misangu yàbùngì, tudi pàmwàpa tusànkila mabènesha àbùngì, mu mùshindù wà tupwà nè mwoyi kùdìwu mafùmine kwìnè.

⁴³ Musangu kampàndà mvwa mukème bikolè. Mvwa muyè nè musumbà wà beena Kilistò bàà mu èkèleeziyà kampàndà, nè kusòmbabò bwà kudyà, kàdì kabàvwakù baalùjile Nzambi twasàkidila, bwà cyàkudyà cyàbò to. Èè, mèmè kwela meeji nè cìvwa cyenze bu cyà pabwàcì. Ke mèmè kuya ku nzùbu mukwàbò, nè bòbò, kàbìdì, kudìbwinka ànu mu didyà. Ke mèmè kukonkoloja bwalu abu. Ke bòbò nè: “Kaa, èè. Aci’s cìdì ànu, Nzambi ngudi ànu mucifile’s, nànsha bìshi. Nwamònu anyi?”

44 Mémè nè: “Cidi cìmvùlwija ngulube mwínshì mwà mucì wà pommes, nudi bamanyè’s. Pommes neyipone, nè kumutuuta ku mutù mu bule bwà ditùkù dijimà; yéyè kààkubàndishakù mèsù muulu, bwà kumòna kùdìyi yìfùmina to.”

45 Nènku aci, nudi bamanyè’s, twétù, ndi ngèèla meeji nè cidi cìtwènzela bìmpè bwà twétù kwimana nè kubàndisha mèsù muulu, bwà kumòna kùdì bintu ebi bifùmina. Kaa, mùshindù mwinè wùdìbi byà butùmbi bwà kuvùluka Mukalenge wetù’s wè, kuvùluka byònsò bìdìYe mutwènzèle, nè kuvùluka nè kakùvwa muntu mukwàbò nànsha umwe uvwa mwà kubifikisha ku dyanzeka to. Kakwèna cintu nànsha cìmwè cìvwà mwà kubifikisha ku dyanzeka to ànu Mukalenge wetù. Nè Yéyè wàkacyènza mu cyanààna, pàvwàku kakùyi muntu mukùmbànyine to; kakùvwa mupròfetà nànsha umwe to, kakùvwa mwena meeji nànsha umwe to, mulombodi wa bukalenge bwalàbàle nànsha umwe, mukòokeshi nànsha umwe, mfùmù nànsha umwe to. Muntu nànsha umwe kàvwakù mwà kucyènza to pa kuumusha Mukalenge Yesù, Yéyè mwinè, nè Yéyè wàkatwènzèlaci nè budiswile bwònsò. Twànjàayi ànu kuvùluka. Yéyè mmucyènzèle bânà Bèndè munda mwà bikondo.

46 Mpindyewu twànjàayi kwakula ànu katanci kakesè pa cintu kampàndà cìikale muntu kampàndà nè cyà kuvùluka. Ndi mwà kudìfwànyikijila, mu Butùmbi mwàmwa dilòdòlò edi nè, mùdi muntu kampàndà dìnà dyèndè Noà, kàdi ncyà bushùwà nè yéyè ùdi nè byàbùngì byà kuvùlukila Mukalenge. Bwalu mu cikondo cìvwà Nzambi nè cyà kubùtula lwonji lwònsò lùvwà pa buloba alu, Nzambi wàkavùluka Noà. Nènku Noà mmuvùlùke mwàkapàndukàye ku ciji cìkolè cyà Nzambi aci, ku luse lwà Nzambi. Mùshindù wùvwà màyi ma—manè matwàdije kutuuta mavwala mu misèèsù, nè bipeepèlè kutuutabi, nè mbwebwe bìbùnguluka ku mikùnà’s! Nènku cipeepèlè cìkolè kaayi cyà cìkwàcisha bwòwà’s wè! Nzùbu kuupukayi, nè mishimì kutaayika, nè Nzambi ùvwa nè Noà munda mwà bwàtù. Mpindyewu, aci cyòci kaciyi mwaba mulenga wà dikèma bwà kuMuvùlukila’s, èyowà, èyowà, bwà kwikala munda mwà bwàtù amu, mukùbìibwe bìmpè bitàmbe mu Bwikadi bwà Nzambi, bwà kusòmba Nèndè’s!

47 Dìbà adi tudi bafwànyine kubiikila kasùmbù kakwàbò kàà bantu, anyì ndikù mufwànyine kwamba nè bàsàtù, nè bààkabiikidiibwa nè Shandàlàkà, Meeshàkà, nè Abèdèngò. Mùshindù mwinè wàkangatàbo luseke lwà Nzambi, bàvùluka nè Yéyè ùtu ùshààla mukwàte ku mulayi Wèndè’s! Nè mùvwàbi nè, mu dìbà dinène edi, bwà ngimànyinù wabò awu, nànsha mene bânà bààbò bàà balume, bààbùngì bàà kùdìbo, bakomè nyimà badìtwe mu maalu à pa buloba. Kàdi bàvwa nè cyà kwimana, nànsha nànkù, nè kwangatabò luseke lwà Nzambi. Nènku pàvwà cìkùtù cyà kapyà aci citwà kapyà kakolè misangu mwandamutekète kutàmbe mùvwàbo kacya bateemèshe kapyà

kwônsò eku amu, nè bààkabàsàkila mu cikùtù cyà kapyà eci.

⁴⁸ Nè ncyà bushùwà nè bàdi mwà kuvùluka Muntu mwinâyi uvwa naabò muntwamu awu, wâkalama luuya lu—lukolè lwônsò alu nè lufù kule naabò. Kùdi cintu kampàndà pa bìdi bitàngilâ Muntu mwinâyi awu. Tudi bafwànyine kwakula Bwendè mu katanci, èyowà's, mukalenge, mùshindù wùvwàYe Umwèpelè uvwa mwà kuvwija aci cikumbàne. Kakùvwà muntu mukwàbò nànsha umwe uvwa mwà kucyènza to pa kuumusha Muntu mwinâyi awu. Nè Yèyè ke Ewu wâkalongolola mwoyi, mu mbàngà yà lufù. Amen. Ke Yèyè—Yèyè kulaminyina ndimì yà kapyà ayi paanyimà, nè kubèèpulayè. Nènku, kaa, pàdiku ànu mwà kwikala civùlukilu, nè cyôci kacýàdyàkujiminakù to, pa nànkù bàdi mwà kuvùluka ditùkù dinène adi mu Baabùlòonà mwàmwa.

⁴⁹ Kuvwa muntu mukwàbò mu Baabùlòonà amu, udi kàbìdi mwà kuvùluka's, nènku's awu ùvwa n'Danyèlè, pààkapàngàdikàye mu mwoyi wèndè bwà nè yèyè kàvwa mwà kudikooyisha nè bintu byà pa buloba to.

⁵⁰ Aci's ke ngiimànyinu mwîmpè wa kwangata. Ke mwaba wùdi wùkèngela bwà twètù bantu kwangata, kwenza bu kutàmba kukoleshakù byà mvità ndambù. Ke cyôci aci. Katwàkudikooyisha nè bintu byà pa buloba to, nànsha èkèleeziyà mukwàbò awu wènza bìshi. Bwètù twètù, netùkolèsheku byà mvità pambidi. Netùshaalè ànu nè Dîyi adi.

⁵¹ Cidi mwà kulwa anyi kuya nànsha ciikàle cinyi, katwàkudikooyishaku to. Bakwàbò bôbò baswè kucyènza, tûngunukàayi nè kucyènza. Pìikalâ bakàji abu baswè kukòsa nsukì yàbò, bàyikosè. Twètù katwàkwenza nànkù to. Ncyà bushùwà. Bôbò baswè kulaaba bilaabu, bàlekèlaayi bàya. Cintàkanyì aci nànsha ciikàle cinganyì, kapenta, bàlekèlaayi bàtûngunuke nè kucyènza. Twètù katwàkucyènza to. Pìikalâ bakwàbò bàmba nè bàvwa mwà kunwà mfwankà nè kabiyi bibènzela bwalu to, èè, bàlekèlaayi bàtûngunukè. Kàdi twètù katwàkucyènza to. Kwajiki. Uh-huh. Bakwàbò bàdi mwà kwalukila kumbèlu, kutangalaja kàlaasà kàà Dyàlumingu—kàà Dyàlumingu kumpalâ kwà dîbà, bwà ndongamu wa ku tèlèviziyò, anyi mu diisàtù dilòòlò, bàpwa mwoyi disangisha dijimà bwà ndongamu kampàndà. Cidìbo bènza nànsha ciikàle cinyi, twètù netùkwacilè Mukalenge mudimu.

⁵² Netwàngatè mwaba bu Yoshùwà nè: “Bwànyì mèmè nè bàà mu nzùbù mwànyì, netùkwacilè Mukalenge mudimu.” Tudi tuvùluka cyàkenzàYe bwà kutùtwàdila dibènesha edi, nè tudi tutàmba kudinanga bikolè mu mùshindù wà katùyì mwà kudìnyangakaja mu mùshindù nànsha wùmwe to. Mbubanjì bwà Mwoyi wà Cyendèlèlè wutùdi naawù, nè mu mùshindù nànsha

wùmwè katwèna baswè kudikooyisha nè bintu byà pa buloba to, nànsha kakesè.

⁵³ Nènku Danyèlè wàkapàngadika mu mwoyi wèndè cintu cìmwècìmwè aci, nànsha mwàkalwàye mwena mwàbò muntwamu amu; kàdi kî nku disungula dyèndè yèyè to, bwalu yèyè ùwà mwenyi. Nènku mwena Kilistò yònsò mulediibwe cyàkàbìdi ewu mmwenyi ànu pàdiye ùlediibwa cyàkàbìdi, bwalu yèyè mmuswikiibwe ku Dyulu. Byèndè—byèndè bintu bidi mu Dyulu.

⁵⁴ Nènku mwab'ewu kùkaadi cikondo kampàndà, mukàjàànyi nè mèmè, kùkaadi bidimu bitwè ku bìbìdi, ùwà. . . Mwanèètù Mercier nè bakwàbò abu eci ncifwànyine kubàsekeshà ndambù, mutùdi mwà kwamba. Tuvwa lwà ku mwaba munène wà cisumbishidi. Nè mu cimenga cyètù, cidi. . . Kaa, kùdi batèndeledi bääbúngì, bää ku dinà's. Kàdi tudì bamòne mu—mukàjì kampàndà uvwa mulwàte jipè, nènku cìwà cintu citàmbe kwikalà cyà pabwàci, bwalu bivwa bimwèka nè mukwàbò nànsha umwe kàwà nè jipè to. Nè—nè pa nàнку tudì bamanyè bääbúngì bää kùdìbo bàdì bimba mu kòralè nè bikwàbò byònsò. Ke. . . ke pa nàнку twètù. . . Mukàjàànyi kungambila, kwambayè nè: “Èè, bwà cinyi?”

⁵⁵ Ke mèmè nè: “Èè, udi umòna's, kî—kî mbàà kwètù to.”

Yèyè nè: “Cinyi?”

Mèmè nè: “To, bòbò kî mbàà ku bèètù. . .”

Yèyè nè: “Bòbò's mbeena Àmèrikè, kî mmwòmò anyi?”

⁵⁶ Mèmè nè: “Bushùwà's. S'mbeena Àmèrikè. Bidi mwà kwikalà nàнку bushùwà.”

⁵⁷ Ndi nsangana mu dyanza dyà ngendu, mu midimu yà bwambi, mu bumpàndànjlà nè mu buloba bujimà, Ndi mbwela mu—mu Allemagne, kùdi nyumà wa ditùnga, ùbìikidiibwa nè, nnyumà wa cyena Allemagne. Nnyumà wa ditùnga. Ndi nya mu Suisse mwàmwa, ndi nsangana nè, pàabu's mbànà bääbù, bääkula mwakulu wàmba kwikalà ànu wùmwèwùmwè awu, kàdi kùdi nyumà mukwàbò. Nwamònu anyi? Nènku nnyumà mushiilàngàne mu Suisse. Pashiishe pàndi ndwa ku Finlande, nnyumà mushiilàngàne ànu menemene. Pashiishe ndi ndwa mu Àmèrikè, kùdi nyumà wa Àmèrikè. Ncyà bushùwà.

⁵⁸ “Èè, wèwè udi wamba nè, twètù katwèna. . .” Yèyè nè: “Twètù katwèna beena mwàbò bää Àmèrikè anyi? Bwà cinyi bantu bèètù bàdi, cikampàndà?”

⁵⁹ Ke mèmè nè: “Èè, udi umòna's, munanga wanyi, udi umòna's, ditùnga nè ditùnga dyònsò dìdi nè mwoyi, ku nyumà wa ditùnga adi. Aci's ke nyumà wa ditùnga nyèyè awu.”

⁶⁰ Yèyè nè: “Èè, dìbà adi, katwènakù bafwànyine kwikalà nè mwoyi ku nyumà wa cyena Àmèrikè anyi?”

61 Mémè nè: “Kaa, to.” Mémè nè: “Tudi balediibwe cyakàbidi. Tudi nè mwoyi ku Nyumà wa mu Dyulu, mùdi cijila, nè bwakàne.”

62 Nènkù twètù, katwèna beena Àmèrikè to, bwà bìdi bitàngila aci, bwalu Àmèrikè ùdi ànu ditùngà dyà pa buloba. Kàdi pàdi muntu wa mu Allemagne, wa mu Suisse, anyi kwònsò kùdiye mwà kwikala aku, pàdiye ùlediibwa mu Dyulu, ùdi ùvwàla Nyumà wa mu Dyulu. Nè ngiikàdìlù wendè nè bìdiye mwenza naabi bìdi bikèba bintu byà kuulu, kùdi Kilistò musòmbe ku dyàbalùmè dyà Nzambi. Amen. Kaa, mùshindù mwinè wùvwàbi bikèngela bwà twètù kuvùluka aci’s wè, nè Yèyè wàkafwà bwà twàmòna mwà kukùmbana bwà kwikala bakolèshìibwe mu lumbu ku cintu eci, basàdiibwe. Neyà bushùwà.

63 Cikùnyìibwà cìmpè cyà mubidi tumatuma kacyèna... Kabyèna bikèngela bwà wèwè kumyamina bwanga pa cikùnyìibwà cìmpè cyà mubidi tumatuma to. Bìshiishi kabyàkucilenga, mwinè to. Neyà bushùwà. Cìshiishi nànsha cìmwè kacyèna mwà kutàcisha cikùnyìibwà cyà mubidi tumatuma to. Ncikùnyìibwà cyà cikoleshila mu nzùbu aci cidi cikèngela kumyamina manga dībā dyònsò, cintu kampàndà cyà dimiinu disopakaja. Kàdi’s ke mùshindù awu wùdibi leelù ewu. Bikèngela bwà twètù kumyamina manga nè kwengeleka èkèleeziyà bikolè. Bìvwa bikèngela kwikalayè muntu-nkààyà mukàyàbàle wa Kilistò, musukula mu Mashì à Yesù Kilistò, nè mulediibwe kùdi Nyumà wa Nzambi. Nè bìshiishi byònsò byà pa buloba bìdi bitangalaka. Kabyèna nànsha mene bìseemena pabwìpi to, byòbi biinè. Abi mbikàyàbàle be, kàdi ndi ntèkemena nè nebikwatè. Ncyenzè bu cyakwidi cikàyàbàle, kàdi nudi bamanyè cìndi ngamba aci.

64 Kaa, mùshindù wùvwà Danyèlè, nè wàngata dipàngadika adi mu mwoyi wèndè, ùdi mwà kuvùluka bimpè difutu dyèndè’s. Kàdi dīngà ditùkù twètù netùvùlukè difutu, twètù pèètù’s. Pa nànkù pàakafikàye ku divùluka aci, mu dībā dyà dikènga, Nzambi wàkatùma Mwanjèlò mu bwinà bwà ntambwe, nè kukànga mukana mwà nyama yà ntambwe, bwà kayìkadi yàlwa kumutàcisha to. Ncivùlukilu kaayi cyà dyela meeji pa bwalu abu’s wè! Yèyè, mwela mu bwinà bwà ntambwe, bwalu ùvwa mupàngàdike munda mwà mwoyi wèndè bwà kusadila Nzambi, nè ùvwa mwà kuvùluka cyòci aci. Mmunyi mwàkenzekàci? Cintu bu nùnkù ewu: “Nzambi mmutùme Mwanjèlò Wendè. Yèyè wàkamòna butòoke bwà mwoyi wànyi.” Kaa, ki bwalu mbwòbù abu’s, butòoke bwà mwoyi wèbè. Nzambi ùvwa mwà kumòna aci mu Danyèlè, nè kiipàcìlā kèndè bwà kwenza cìvwà cijaalàme, nè Yèyè wàkatùma Mwanjèlò Wendè nè wàkapangisha ntambwe bwà kayìmutàcishi nànsha kakesè to. Cìvùlukilu kaayipu’s wè! Tudi bafwànyine kutùngunuka ànu kutùngunuka, nè cyòci aci.

65 Tùvùlukààyi ànu muntu mukwàbò kaaba aka mene, anyi kasùmbù kàà bantu, ke Izalèèlā awu. Pàakaditèèkà Izalèèlā

pa kaaba kààbò, bôbò biinè mu mwaba, bwà kwangata luseke lwà Nzambi. Nènkù kùvwa kùlwa mwanjèlò wa lufù dilòòlò kampàndà, uvwa nè cyà kwangata mwanààbutè wa nzùbu yònsò. Kàdi mùshindù mene wàkatùminàbo Izàlèèlà díyì bwà kuvùluka nè mashi àvwa pa dikunji dyà ciibi. Aci's ke cintu cyàkalamìnà cijì cicolè cyà Nzambi paanyimà, nè kubàlama mwaba awu, biikàle nè mwoyi, cìvwa mmashi ku ciibi. Cìvwa ncivùlukilu. Nè cyòci aci, misangu yònsò, cicidi ànu civùlukilu, mashi pa dikunji dyà ciibi nè pa mukamba. Ndilòòlò kaayi dyà civùlukilu divwàci's wè! Nènkù cìvwa nè cyà kwalujiibwa mu—mu bikondo bicìvwa bìlwa abi, bwà nè Nzambi, mu dilòòlò adi, wàkafila dishiilangana pankaci pàà baakàne nè babi.

⁶⁶ Kaa, ncyèna mumanyè ní cìkala dilòòlò anyi to, kàdi nekùlwe ditùkù diikalà Nzambi mwà kuleeja dishiilangana didi pankaci pàà baakàne nè babi. Nènkù's neciikale civùlukilu kutùdi, bwà kumanya nè Mashi àdi bushùwà pa mukamba nè pa dikunji dyà ciibi. Nènkù mwaba wònsò wùdi utàngila, anyi dyumvwa dyèbè; udi utàngila nè mèsù èbè, nè umòna nè mwoyi wèbè. Ncyà bushùwà. Neùvùlukè nè udi utàngidila mu Mashi à Mukalenge Yesù, mùshindù wùvwa Ye mwà kucikenketa. Cikondo kaayi's wè! Bàvwa . . .

⁶⁷ Izàlèèlà ùvwa nè cikwàbò cintu cìvwbò bafwànyine kuvùluka misangu yònsò, cyà nè pàakeelàbo cidya cyàbò pa cyàkumvwàbo Mòsà wàmba, mupròfetà munène mùshindika kùdi Díyì dyà Nzambi awu, nènkù pààkangatàbo dipàngadika dyàbò bwà kwasa lwendu. . . Bwalu bàakamòna Nzambi ùshindika nè mukenji wùvwaye ùtwàla awu wùvwa bulelèlà, nè ùvwa bilondèshile Mifundu, nè Nzambi ùvwa nendè. Nènkù wàkatuutakeena nè Ewu Uvwa kàyì nè dìnà ewu, dyèndè nè NDI. Ncyà bushùwà nè yèyè ùvwa mutuutàkèene Nendè, bwalu bàakaMumòna ùkwàta mudimu nè Mòsà.

⁶⁸ Ke pashiishe bàvwa nè civùlukilu cikwàbò cinène, cyà nè pàakabangàbo lwendu alu, kwàkaya Dikunji dyà Kapyà kumpàlà kwàbò, bwà kulombola njila. Ncivùlukilu kaayi cìvwbò bafwànyine kwela meeji, cintu kampàndà cyà civùlukilu, cyà nè kabàvwa dijinga nè kaleeja-nord to. Amen. Ngàmbi cinyi? Kabìvwa bibàkèngela kaleeja-nord to. Bàvwa nè Bukènkè bwà Nzambi bwà kubàlombola.

⁶⁹ Cìvwa ncivùlukilu kaayi bwà beena meeji, mùshindù wùvwbò kabàyi dijinga nè kaleeja-nord, ke Mùtootò kubàlombolawù.

⁷⁰ Ncivùlukilu kaayi cidìci kutùdi leelù ewu, bwà kwikala nè Nyumà Mwìmpè bwà kutùlombola; kì ntwitabàayi kampàndà, anyi citembelu kampàndà, anyi cintu kampàndà bwà kutùlombola, anyi cintu kampàndà cikwàtakaja kùdi bantu to. Kàdi Nyumà Mwìmpè ùbwelela pa dikunji dyà kweyemena dyà Díyì, nè ùshindika Díyì Dyèndè, nè ùjaadika nè didi—didi

bulelèlè. Ncivùlukilu kaayi mu myoyi yètù, bwà kumanya nè Nzambi udi nè mwoyi ùcidi ànu nè mwoyi. Kaa!

⁷¹ KuMuvùluka, cyàkenzàYe aci, wàkabàlombola njila mujimà too nè ku buloba bulaya, mu mùshindù ewu.

⁷² Eliyà ùvwa nè cintu cinène cyà kuvùlukilakù Nzambi, pàvwàye mwenzè mudimu wèndè, ànu menemene cyàkamwambilà Nzambi bwà kwenzayè, bwà kutùminayè mvùla díyi, nànsha mene lumuma kalwàkumatakù to too nè pàvwàye mwà kumusòka. Kuyayè kasòmba pabwípi nè kasùlù kàà Keelità, muntwamu. Wàkashààlamù díbà dyònsò edi. Mùshindù mwinè wùvwàye mwà kuvùluka cyòci aci's wè! Mmunyi mùvwàye mwà kupeta cyàkudyà, munda mwà bidimu ebi? Kàdi Nzambi wàkamudiishila kùdi bikòlòlò. Nzambi wa mu Dyulu! Kakwèna mpatà to nè: “Bikòlòlò ebi byàkapeta cyàkudyà penyì?” Katwèna bamanyè to, katwèna mwà kucyàmba to. Cintu cimwèpelè, cìvwàye mumanyé, yèyè wàkadilàmbula ànu ku Díyi dyà Nzambi, dyàkalayàYe adi. Ke Nzambi kwambula bujitu bwà byònsò.

⁷³ Ke cyònsò cidi cikèngelà bwà twètù kwenza aci. Bàna bèètù, ke cyònsò cidi citùkèngelà aci, cidi ànu kuMukwàcila ku díyi Dyèndè. Mmunyi mwikalàYe mwà kucyènza? Ncyèna mumanyè to. Kàdi, nudi numòna's, twètù tudi tuteeta kufunyika mmwènenu yètù twètù, nènku's ke mwaba wutùdi tucibwejakajila ngòwò awu.

⁷⁴ Ambàbi túng bu yèyè mwà kwamba nè: “Kasùlù kakwàbò kàvwà kwínshì kwà kakùnà aka nkafwànyìne kwikala ànu kimpè, bwalu kàdi nè màyi àbùngi mu kòkù amu”? Huh-uh. To.

⁷⁵ Ambààyibi túng bu nè Abraham ùvwa mwelè meeji nè bìvwa bikèngela bwà kwangatayè Sodomà? Kacìvwakù mwà kwikala cyenzèke mu mùshindù mujaalàme to. Kàdi Abraham wàkangata njila uvwa Mukalenge mumulombòle, mulayi wèndè wùmwèpelè wùvwàye nè cyà kushààla mukwàtekù.

⁷⁶ Eliyà ùvwa mwà kuvùluka pàvwàye mwenze byònsò bìvwàye mwà kwenza abi. Yèyè—yèyè wàkatàndisha bakàji bònsò bàà—bàà mu ditùkù adi, bàakateetà bwà kutentula mukàji wa mfùmù wa ditùnga awu, mukàji wa mfùmù wa ditùnga, nè—nè bintu byònsò bìvwàye—bìvwàye mutàndìshe abi. Nè—nè bàvwa bàmbiikila nè ng'wa kale, ngèela meeji, ànu mununu, muntu kampàndà wa mupwekèle. Nè wàkaya, kàdi kwenza ànu menemene cìvwà Nzambi mumwambìle bwà kwenza aci. Ke pashiishe kulwaci ku diteetangana dyà makàndà, mwaba wàkambàye nè: “Twànji tùmònèbi nè mbyèpi, ku bintu ebi, bìdi bilelèlè. Mpindyewu, nwènù nudi nubiikila bapròfetà bàà—bàà Baalà kuntwaku, nè—nè nubiikila bapròfetà bèndè. Nènku lekèlaayi nsokè Mukalenge.” Kaa, diteetangana dyà makàndà kaayi's wè, pàakamanyàye nè Díyi Dyèndè divwa dicilayè.

⁷⁷ Ncinyì citùdì mwà kwamba leelù ewu twètù bu beena Kilistò, kumpàlà kwà cyena Boudhisme, Ci-Mùzùlùmanyi, anyi cintu cikwàbò kanà cyònsò eci? “Twǎnjì tùmonebi nè udi Nzambi nganyi.” Amen.

⁷⁸ Kùkaadi cikondo kampàndà, lwà mu Inde mwàmwa, mutùvwà tusanganyiibwa mu—mu disangisha, nè mwòmù amu mùvwà bantu bààbùngì, kàdi bànaayi ànyi bàtaanu kulwabò ku cyambilu aku. Nènkù kakùvwà mùshindù wà dicinka bùngì bwà bantu bàvwà kuntwaku. Ke mèmè kusambidila mwena nsudì kampàndà mukesè. Kàvwà nè mabòko to, nè maci èndè àvwà madyà makunya, nè tupòmпокòtò tokesè. Nènkù ùvwà ùteeta bwà kunguupukila, nè mèmè kumuupukila, nè kumusambidila. Mukalenge kungambila cìvwà cìmutàcisha, nè—nè bwà nsòmbelu wendè.

⁷⁹ Nènkù—nènkù mvwa mwà kumòna ba-Rajas nè bakwàbò basòmbe pambèlu apu. Kwambabò nè: “Aci’s ndubùku, nudi numòna’s.” Udi mwà—udi mwà kumanya, mùshindù wùvwàbo bèèla meeji, cìvwàbo—cìvwàbo mwà kungaalujila.

⁸⁰ Ditùkù adi, bààkangaakidila mu ntempèlu wa ba-Jains, mwaba wùvwà ntèndeleeleu mitwè ku dikùmi nè mwandamutekète mishìilàngàne muntwamu, nè yònsò wa ku yòyì ùbèngangana nè bwena Kilistò, nè: “Kakùvwakù cintu nànsha cimwè mu bwena Kilistò to.”

⁸¹ Kàdi, dilòòlò adi, Nzambi kushintulula ndongamu. Twètù kubanga kubala ku cikèbelu aci, ku mushimì Wèndè awu. Ke Nyumà Mwìmpè kubanga kubuulula. Nènkù paanyimà pàà katancì, Indien kampànda kulwayè mwaba awu, nè ùvwà mpofo. Mèmè kwamba nè: “Muntu ewu ùdi mpofo. Twètù bònsò tudì mwà kumòna aci. Kàdi yèyè’s mmuntu musèlàngàne. Ùdi nè bàna bàà balùmè bàbìdì.” Mèmè kwamba nè: “Nènteelè dìnà dyèndè ku dileetà ku dileetà. Ncyèna—ncyèna mwà kudishindumunakù to.” Nènkù aci cìvwà ànu menemene cyà bushùwà. Nènkù ndi—nènkù mvwa mwà. . .

⁸² Bòbò bàdìbo bàbìikila nè mbantu bàà cijila, nè bònsò abu kuntwaku, nè baakwidi bàà ba-Mùzùlùmaanyi abu, nè basòmbe mwaba awu. Nè pa nànkù bòbò—bòbò kumanya dìbà adi, kudyàmbidilabò nè mvwa munkaci mwà kubala meeji ààbò, lubùku.

⁸³ Ke nànkù kwenzekabi nè ngèlè mèsù paanyimà, ke mpofo ewu, ànu mu cikèenà-kumòna pamutù apu, mwimànè mwaba awu munkaci mwà kuntàngila. Kaa, ekèlekèle! Nudi bamanyè’s, musadidi wa Nzambi, Nyumà Mwìmpè, ùkaavwa mumanè kutwàla. . . cìvwà cìfùnda pa cikèbelu, nudi bamanyè’s. Mèmè kumanya nè cìvwà pabwìpì bwà kufidiibwa kùdì bantu.

⁸⁴ Mèmè nè: “Mpindyewu, bàvwà bangambila leelù ewu nè ntèndeleeleu wa ba-Mùzùlùmaanyi ke udi mutàmbe bunène pa buloba, nè beena Bouddha, nè bònsò.” Mèmè nè:

“Mpindyewu, ndi muswè bàmwè bàà kunùdì nwènú baakwidi bàdì kuntwaku, baakwidi bàà beena Bouddha, baakwidi bàà ba-Mùzùlùmaanyì, àlwe kupèèsha muntu ewu lumònù lwèndè, bushùwà, mpindyewu, piikalàbí nè yèyè—yèyè mmunène bikolè. Muntu ewu mmukuukwidi wa díbà. Nè twètù bônso tudi bamanyè nè, twètù bàdì biitabuujà nè yèyè ùvwa mupìile, wàkakuukwila bufuki pamutù pàà Mufùki.” Mémè kwamba nè: “Yèyè ùvwa mupìile, nè tudi bamanyè nànkù. Kàdì,” mémè kwamba nè, “ncyà bushùwà nè Nzambi udi Mufùki awu; nè muntu awu mmuswè kulwa bwà kukwàcila Mufùki awu mudimu; ncyà bushùwà nè Yèyè ùdi pabwîpì nè kuDimwènesha.”

⁸⁵ Mpindyewu, ndi muswè kwamba cintu kampàndà. Ncìvwa mufwànyine kwikala mucyambè nànsha byà munyì bu nè ncìvwa mumòne cikèèna-kumòna aci to. Mvwa mumanyè cìvwà cìmpè citàmbe aci. Nudi numòna’s, ke citùdì katùyì baswè aci, bwà kwikala kudìcinkila. *Kudìcinkila* mbwena kwamba nè “udi munkaci mwà kwenda kuya mutàngile kumpàlà kùyì nè bukòòkeshi to.” Ke bwà cinyì tudi baswè kutàbaleela paùdì wamba nè cidi ng’EMU MMÛDÌ MUKALENGE WÀMBA, kacìyì ànu didifwikajila cyanàànà to, kàdì cintu kampàndà cyùdì mumanyè mu kaabujimà, cilelèlà, nè Mukalenge ngudi mucyàmbè. Ke mémè kudyùmvwa musàmbiibwe bikolè pa kumòna cikèèna-kumòna aci, mumanyè nè kacya kacitukù cipangile to.

⁸⁶ Ke mémè nè: “Mpindyewu, kùdì—kùdì..Muntu ewu yèyè mupìile. . .Mpindyewu, ba-Mùzùlùmanyì bàdì bàmba nè mmupìile, nè pashìishe udi umuvwija mù—mù—Mùzùlùmanyì. Díbà adi, mwena Bouddha’s mmufwànyine kwamba nè yèyè mmupìile. Nè ba-Sikhs, nè ba-Jains, nè bakwàbò abu, bônso’s mbafwànyine kwamba nè mmupìile. Kàdì’s ncyà bushùwà nè kùdì Mwakàne mwaba kampàndà.” Kaa, ekelekèle! Kaa, cintu kaayì cyà butùmbi’s wè! Pashìishe mémè kwamba nè: “Mpindyewu, Ewu wàmupèèsha lumònù awu, yèyè ewu’s mmulayè nè ùvwa mwà kukwacila Nzambi awu mudimu.”

⁸⁷ Yèyè ùvwa mushààle mpofo, ku ditàngila dyà ku díbà, bwalu cìvwà n’nzambi-dìbà. Nwamònu anyì? Nènku ùvwa wèla meeji nè aci cyàkafuta njila wendè bwà kuya mu Dyulu. Mpindyewu, tudi mwà kuvùluka Kilistò nè, Yèyè—Yèyè wàkakènga kacìyì bwà kutùshipa mèsù to, kàdì bwà kutùpèèsha lumònù. Nwamònu anyì? Nànkù díbà adi, nè bu. . .

⁸⁸ Mémè nè: “Mpindyewu, Ewu wàlwa kupàtula cyòci eci awu, mémè nèndondè kasùmbù aku.” Mémè nè: “Nènkwaicile Ewu udi umupèèshulula lumònù lwèndè awu mudimu.” Kàdì aci’s ke cìvwà musùmbà wà mutàmbe kwikala wà mupùwe viiviivi wùnkààdiku pàànyì muumvwè. Muntu nànsha umwe kààkaakulakù to. Pashìishe mémè kwamba nè: “Èè, nyèwù kùdì mwakwidi wa ba-Mùzùlùmaanyì kuntwaku mpindyewu, bwà cinyì kùyìkù ulwa kumupèèsha lumònò lwèndè?” Mémè

nè: “Bwà cinyi’s? Mbwalu kwèna mwà kucyènza to. Nànsha mémè pàanyi ncyèna mwà kucyènza to. Kàdi Nzambi wa mu Dyulu mmubiishe Mwan’Èndè, Yesù Kilistò, Yèyè ngudi mundejè cikèèna-kumòna mpindyewu mene awu, nè muntu awu neàpetululè lumònù lwèndè. Byòbì kabiyi nànkù to, díbà adi mémè ndi ntèmu wa mashimi wa Kilistò ewu. Kàdi yèyè mulùpeta, díbà adi mémè ndi ntèmù mulelèlà Wendè. Nènku nudi nè cyà kunyi- . . . Bivwa bikèngela bwà nwènù kunyingalala, cyanààna nudi nè cyà, nwènù . . . cyanààna nenùfwe mu kasumbù kanùdi nusanganyiibwamù mpindyewu aku.” Cikondo kaayipu’s wè! Ke mémè nè: “Mpindyewu, piikalàbi nè aci ncyà mafi, díbà adi’s bivwa bikèngela bwà nwènù kungeela mu ndèkè nè kumpingaja buludi ku Ètats-Unis, nè kanùyì nungitabila bwà mémè kwalukila kàbidi to.”

⁸⁹ Kaa, kàdi pàakalwà Nzambi wetù mu cyalu’s! Muntu awu, ndi mwenzè ànu mmusambidila, ùvwa mwà kumòna bimpè ànu bu mémè kùnu. Kuyayè lubilu è kupyàye mulombodi wa cimenga kunshìngù nè kubangayè kumuupukila. Kàdi, mòna’s, byàkangata mèbà matwè ku ànaayi. Ncìvwa nè bisàbaatà to, nànsha nè mpaaya mu nkooci wanyì to, nè bampùlushi kabàvwa mwà kubàlama kule naanyì to, nènku’s bàvwa bènda bèndelangana pambidi. Kàdi’s bivwa bikèngela nwènù kumòna cìvwa. . . .

⁹⁰ Kàdi cìvwa ncinyi? Nzambi umwèumwè awu, Nzambi umwèumwè uvwa mwà kubiikila Kapyà awu, ùtùulula Kapyà bwà kuumusha mulàmbù wèndè awu, ùdi mwà kutwàla Nyumà Mwìmpè Wendè bwà kushìndika Dìyì Dyèndè nè Dìdi bulelèlà, bu munùdi batwishiiibwe nè Aci mbulelèlà.

⁹¹ Mpindyewu, Eliyà ùvwa mutwishiiibwe nè cìvwa bulelèlà, ùvwa mùmwè Dìyì dyà Nzambi. Kakwèna mpatà kùdiye to.

⁹² Nè kakwèna mpatà mu mwoyi wèbè dilòlò edi to, bwà nè Nzambi ùcidi ànu ùfila Nyumà Mwìmpè mwàkenzàYe mu Ditùkù dyà Mpenta amu, nebyenzekè. Piikalàku kakùyì mpatà to bwà nè Yèyè ùtu ùshààla mukwàte ku Dìyì Dyèndè nè òndopa babèèdi, bikèngela cyènzekè. Kàdi bikèngela wikalè mutwishiiibwe bwà cyòci aci. Bikèngela bulelèlà bwà ùcimonè nè mèsù malelèlà à diitabuuja, pashiishe ùciitabè nè ùshààle ànu mwimàne mwaba awu.

⁹³ Nènku ùvwa nè byàbùngì byà kuvùlukila Nzambi, pàvwàye. . . Mpindyewu ùdi nè byàbùngì byà kuvùluka, byàkenzàYe mu matùkù awu abi.

⁹⁴ Mukàji wa nsòmbelu wa masandi wàkasangana Yesù mu Suukà kuntu kwàka awu, nè ùvwa mwena Sàmaalèyà, bòbò bàvwa bushùwà bantu babèngiiibwe bàvwa bulelèlà biitàbùùje Nzambi. Bàvwa benze citùpà beena Yudà nè citùpà bàà Bisàmbà byà bendè, nè bàvwa cì—cìsà. Bàvwa biitàbùùje Nzambi. Nènku mukàji mukesè, wa nsòmbelu wa masandi ewu mu ngiikàdilù

wendè awu, mukooyiishibwe bikolè kùdi mpèkaatù, nènku dîngà ditùkù pàmwâpa ùkaavwa mutekèshibwe mu mabòkò nè bilèlè byàbò byònsò byà bakùlu abi, byà nyingù nè mbidikà, nè byà dibisukula, nè bikwàbò.

⁹⁵ Wàkaya ditùkù kampàndà ku ciinà cimwècimwè cyà mâyi cyà Yakòbò aci kuntwaku, nènku ùvwa nè cyà kupwekesha mbekeci wendè—wendè awu, bwà kupeta ndambù wa mâyi. Ke kushintululayè tusùlù. Kaa, mùshindù mwinè wùdiye mwà kuvùluka nè kùvwa Kampàndà musòmbe mwaba awu wákamba nè munda Mwèndè mùvwa Mâyi àdi nè mwoyi. Ndisànka kaayi divwàci kùdiye, pààkabuululàbo mpèkaatù yèndè kùdi Ciinà cyà mâyi à mwoyi aci, nè kumwambila mwaba wùvwàye mupùile, nè kumuumvwija civwàye mwenzè. Nènku cyàkatèeka mukenji kampàndà munda mwà mwoyi wèndè, wàkamulàkusha kapyà nè butùmbi bwà Nzambi; nènku mu cimenga, nè kùdi bantu.

⁹⁶ Mpindyewu, nudi bamanyè's, ncyà bushùwà nè aci kî ncikùmbànàngàne nè mikenji mu ditunga adi to, bwà mukàji kuyayè mu misèèsù, nè nangàngà mukàji kampàndà uvwa nè cimanyishilu cyà nsòmbelu wa masandi. Kàdi ndi nzwàmbila nè, pààkakezudiibwàye nè kunwà Mâyi matalàle awu, nuteetèbi kumwimanyika's? Civwa bu kuteeta—kuteeta kujima ka—kapyà, ku nzùbu kampàndà, pààkù kwikale mushipu ànu wètù mukolè ewu, nè cipeepèlè cicolè mu cikondo cyà mushipu mukolè, civwà bulelèlè cipùùdila ludimì lwà kapyà alu.

⁹⁷ Kàdi kùvwa mwà kumwimanyika to, bwalu wàkadi mujandùle cintu kampàndà civwà cilelèlè. Mpèkaatù yèndè yàkeediibwa patòòke. Nènku pààkeediibwà mpèkaatù yèndè nè maalu mabi patòòke, ùdi mwà kuvùluka dilòòlò edi, mu Butùmbi mwàmwa's. Ùdi mwà kuvùluka nè kùvwa Mpokolo bwèndè yèyè. Kùvwa mwaba kampàndà wùvwa, twitabàayi yònsò nè—nè èkèleeziyà mimubènge, kàdi nànsha nànkù yèyè kupeta mwaba wà mâyi à kunwà mu cipèèlè. Wakajandula mwaba kampàndà wùdi wùsanganyibwa Kampàndà Uvwa ucyùka. Disànka kaayipù's wè!

⁹⁸ Nè mùshindù mene wutùdi mwà kusànka nendè, twètù bààkadi baswikila panshi kùdi twitabàayi yivwà yitùlalula kule nè Nzambi, nènku tudi basangàne Mpokolo mùle tentè nè Mashi makòka mu mijilu yà Èmanùwèlè. Mwómù amu tudi tujimija ngiikàdilù wètù muumàkàne awu. Nè—nè tudi banwina ku Mpokolo nè tudi bapetà cyashima. Nènku tudi tuvùluka Ewu wàkafuta mushinga, bwà twamòna mwà kupeta Nyumà Wèndè pambidi pèètù, Yesù Kilistò, Mwànà wa Nzambi awu. Civùlukilu kaayipu cyà kuvùluka's wè!

⁹⁹ Ndi ndifwànyikijila dilòòlò edi nè Hagàà awu ùvwa pèndè mwà kwikala nè cintu kampàndà cyà kwelakù meeji, yèyè pèndè, pàvwàye mwediibwe pambèlu, bamuumvwè bibi. Mpindyewu

kùdi bààbúngì bàà kutùdi kaaba aka bàdi mwà kwela meeji bwà Hagàà, bwa mùvwàye, bamuumvwe bibi.

¹⁰⁰ Nganyi udi wenda lwendu lujaalàme pàmwè nè Nzambi, udi wangata njila mululàme, nè mubùmbàkàne, kàdi kàyì mumanyè cidi kwikala mumvwa bibi? Mèmè ndi mumvwa bibi. Muntu yònsò, nwènú bàna bèètù bònsò bàdi bàteeta kwikala nè nsòmbelu mujaalàme, nè nwènú bàna bèètù bàà bakàji, mbanuumvwe bibi.

¹⁰¹ Beena mutumba bèèbè bàdi bèèla meeji nè wèwè udi wa cyena kale, nè bàdi bàteeta kukwelulwila. “Bwà cinyi kwèna ukabwela mu tusùmbù etu? Nè bwà cinyi kwèna uya mu bisùmbù byà banàyi bàà twartà, kaa, nè bikwàbò?” Kàdi nudi nwepele bintu abi. Mbanuumvwe bibi.

¹⁰² Ke mwàkadibo búmvwà Hagàà bibi. Nè yéyè ùvwa nè mwanèndè mukesè wa balùme, Ishàmèlà mwànà awu, uvwa dimuma dyà munda mwèndè, wa ku dibàkà dyà mikenji nè bàyèndè Abraham. Nè yéyè ùvwa—yéyè ùvwa nsongàakàji mupika. Nè wàkafidiibwa kùdi mfùmwendè mukàji wa mudimu, Sarah awu, kùdi Abraham, bu mukàji; bwalu, disèlà dyà bakàji bààbúngì dívwa dipetangana nè mikenji mu miinè matùkù awu. Nènku yéyè mukàji awu ùvwa musèdiibwe kùdi mulùme awu bilondèshilàngàne nè mikenji, bwalu bàvwa bamupèesheyè. Yéyè wàkalela mwànà, ànu civwà ditèkemena dyàbò aci. Kakùvwa cintu nànsha címwè civwà mukàji awu mwenzè kaciyi mu cyòci to. Kàdi, nànsha nànku, muumvwa bibi kùdi mfùmwendè mukàji wa mudimu, nè kumwipata pambèlu mu cipèèlà bwà kufwà. Mwaba kaayi wàkusanganyiibwa’s wè!

¹⁰³ Kàdi mâyi àkaavwa majikè mu mùlàngì. Muminu wà Ishàmèlà mwànà awu wùkaavwa mubangishe kuuma. Ùvwa ùdila bwà mâyi. Kàdi kubiipabi’s. Nènku ànu mwoyi wà maamù ke wùdi mwà kuumvwa mwadi wà mwànà mukesè wa mu dibòkò awu, nè mishiku myùme mu—mu cipèèlà mwaba kampàndà, yà mwanèndè umwèpelè wa mu dibòkò, kàdi ùmvwa mubidi wèndè mukesè awu wènda wùminyina, nè mwikalè ùpunga nè lufù. Kakùyì mâyi to, ànu mbwebwe nè lusenga, ànu bu munùdi bafwànyine kutàngila mu bipèèlà byà Phoenix emu. Kaaba nànsha kàmwè. Muumvwa bibi! Cikondo kaayipu’s wè!

¹⁰⁴ Ki yéyè awu’s, mwànà wa bakàji mupika, ànu kwìnè kwònsò aku, kàdi ùteeta bwà kwenza maalu mu mùshindù mujaalàme wùvwàye nè cyà kwenza awu. Kàdi’s ke yéyè ewu nè mwànà mu mabòkò èndè, kàdi mwikalè ùpunga nè lufù. Nènku ùvwa mubungàme be. Wàkamutèeka mwìnshi mwà kaacipuka kakesè. Nè kuyayè bu mu ntàntà wa mukete mukùpa nè butà, nè kutwàye binù panshi bwà kusambila. Kàdi kumwènekakù ciinà cyà mâyi, kaa, ekèlekèle: “Ciinà cyà mâyi cyà Ewu udi nè mwoyi nè mummòne.” Cìcìdi ànukù too nè leelù ewu. Civwa citèekiilwe

mwaba awu, mu mùshindù kampàndà. Ciinà cyà mâyi aci cìcidi ànukù bu civùlukilu.

105 Ncyèna mulonge kàlaasà kakùmbàne bwà kucishindumuna to. Kàdi ndi—ndi mucitèete, kùkaadi katanci, pâmvwà munkaci mwà kufùnda tuntu kampàndà tukesè. Ke mémè—mémè kuteeta kucishindumuna. Ncyèna mwà kucyènza to. Kàdi nudi bamanyè cìdici's. Ndi—ntu ncibiikila cintu kampàndà, cikwàbò. Mémè nè: “Mbitàmbe bwìmpè mémè kubènga kwamba nàнку. Necitambè ànu kuleeja dipanga dyànyi.”

106 Kàdi cintu cìmwèpelè cìndi muswè kwamba. Ndi mumanyè mwaba wùdi Ciinà cikwàbò cyà mâyi cyàkatèèkiibwà mu Ditùkù dyà Mpenta. Cìdi ànu cikàngula dilòòlò edi ànu mwàkadici cikondo cyàkakàngudiibwàci kale wàwa, nè mâyi àdi ànu nè cyashima kùdi mulùme yònsò anyi mukàji yònsò udi muswè kulonda njila mujaalàme pàmwè nè Díyi dyà Nzambi awu, nè kwenda Nendè.

107 Ndi ndwa ku ciinà cyà mâyi eci, mvùluka Yesù Wakacivwija cikùmbàne bwà mémè, mwenyi, mwànà wa mukwàciki wa maalà, mufwànyine kulwa ku Ciinà cyà mâyi aku nè kufwidiibwa luse ku mpèkaatù yànyi, nè kunwà Mwoyi wà Cyendèlèlè.

108 Kaa, mùshindù mwinè wùvwà Hagàà nè cyà kwikala mudyùmvwè pààkamònàye ciinà cyà mâyi aci's wè! Cyàkasungila mwoyi wèndè nè wà mwanèndè mulela awu. Ncyà bushùwà nè ùdi mwà kuvùluka mwaba wà mâyi wà mu cipèelà awu, matùkù èndè ónsò à mwoyi, nè díbà dyònsò—dyònsò dìdiye mwà kuàvùluka adi.

109 Tudi bafwànyine kutungunuka, nè bantu. Kàdi, twánjàayibi ànu kwela meeji ku eci, kanùpangidikù kumòna ciinà cyènù cyà mâyi aci mpindyewu to. Kanùpangi kumòna dikeji dyà cyashima dìdì ditwàla Mwoyi edi to.

110 Yesù wàkatùmiibwa kùdi Helòòdè bwà. . . kuumuka kùdi Pilaatù kuya kùdi Helòòdè, bwà tuseku. Cyàkapangilaye's! Bwalu bùvwà cinyi—cinyi nè Pilaatù?

111 Nè pashiishe pàakatùmà Pilaatù Yesù kwà Helòòdè, nè pashiishe mùvwà Helòòdè mukùtākàne. Díbà adi, úkaavwaku muumvwè bààkula Bwèndè, nè úkaavwa mùmvwè bààkula bwà mudimu Wèndè wà bwambi. Nè Pilaatù mwikàle mwena Yudà. . . Anyi, Helòòdè, ngèela meeji nè ke mwàkadìbi, Helòòdè ùvwà mwena Yudà. Nè mwimàne mwaba awu kumpalà Kwèndè! Kàdi's ke yèyè awu, mwimàne mu Bwikadi bwà ewu uvwa baprófetà bónsò bambe biprófetà pa bwalu Bwèndè, kwambwila ànu ku Edènà kwàka. Mwimàne mu Bwikadi, kàdi kààkalòmba difwidiibwa dyà luse ku mpèkaatù wèndè to. Yèyè kacya—yèyè kacya—yèyè kacya. . . Ndi ndikonka ní ùvwakù mene wèla meeji, kwelayè meeji cyàkàbìdì, à civwà, Nganyi uvwa mwimàne

kumpàlà aku? Kacya kàvwa pàmwápa mumanyè Mwena—Mwena mu Bwikadi mùvwàye mwimàne amu to.

¹¹² Kaa, wèwè udi wamba nè: “Aci’s cìvwa—aci’s ncintu cyà cyenza bwôwà! Aci’s cìvwa ncintu citàmbe bukùtakàne.” Ki mùvwàci bushùwa. Cìvwa cintu cyà citàmbe kukùtakana cikaavwàku muntu awu mwenzè kacya. Èè, tudi twela meeji bwà—bwà mùshindù wùvwàye mubi.

¹¹³ Kàdi anjì indilaayi kakesè. Tudi nè bantu leelù ewu bàdi bènza cintu cìmwècìmwè aci, biimàne ku Mpokolo wumwèwumwè awu, kàdi batùngùnùke ànu nè kwenza cilèmà cìmwècìmwè cyàkenzàye aci.

¹¹⁴ Bapròfetà bònso, munda mwà bidimu binunu binaayi bàvwa bàMufunkuna. Kàdi bwalu Yèyè kààkalwa mu mùshindù úvwà twitabàayi yàbò ayi, myàmbe nè Neàlwe, bààkaMwipata.

¹¹⁵ Mwaba awu, s’ncyà bushùwà menemene. Ncyà bushùwà menemene. Èyowà’s, mukalenge. Bàcidi ànu bàMwipata. Bòbò kí mbaswè kwikala naaci bwalu to, ànu cyòci cilwè bilondèshile mukàndà wàbò, nudi bamanyè’s, mùshindù wùdi mukàndà wàbò wà kubala wùcibala, nudi numòna’s. Bikèngela cìlwe mùshindù awu.

¹¹⁶ Kaa, bapròfetà bònso munda mwà bidimu binunu binaayi abu bàvwa baakùle Bwèndè, kàdi’s ki Yèyè ewu mwimàne kumpàlà kwèndè, kàdi yèyè kààkambakù cintu nànsha cìmwè cyà nè, kulòmba difwidiibwa dyà luse to. Ki yèyè awu mu Bwikadi, nè—nè dyula dyà mèyì ònsò à bapròfetà bàà beena Ebèlù abu, mwimàne ànu kumpàlà kwèndè, kàdi kààkalòmbakù difwidiibwa dyà luse to. Wàkashààla ànu kacya wìmana mwaba awu. Kaa, aci’s cìvwa cintu cyà cikwàcisha bwôwà’s!

¹¹⁷ Kàdi tudi twenza cintu cìmwècìmwè aci leelù ewu. Cibi, tudi biimàne ku luseke Lwèndè, paanyimà pàà bidimu binunu bisambòmbò. Tudi twenza cilèma cinène kutàmbe cyà Helòòdè, nè Pilaatù, nè—nè Kaayifà, nè baakwidi bàà mu ditùkù adi, bwalu tudi nè bidimu bikwàbò binunu bìbìdì byà majaadiki bisàkidila. Nè tucidi ànu twenza cilèmà cìmwècìmwè aci. Ànu, ndi ànu . . .

¹¹⁸ Ndi ngèèla meeji nè—nè Helòòdè kààkacyèlela meeji à dîsù dikolè nànsha.

¹¹⁹ Mpindyewu, ndi ànu ndìkonka mùshindù wà dîsù dikolè wutùdi twela meeji pa Bwalu ebu. Mmùshindù wà dîsù dikolè kaayi wunùdi nuteeta kutwà Dìyì edi mushinga? Dìyì adi didi dyùmvwija cinyi bwèbè wèwè? Nudi bamanyè nè n’Nzambi mu mmwènekèlu wa mutuuta ku cyamù anyi? Kàdi tudi twendelapù, bwà twitabàayi wa mùshindù kampàndà, nè twamba nè: “Matùkù à bishimà àkaadi mamananè kupita. Docteur Jones mmwàmbè *cikampàndà*, pa nànkù aci’s ncikòse bwalu.” Kàdi, pèèndè, Bible ewu mmutèèka mu makàjiinyi ònsò à mikàndà, pàmwè nè ònsò, mu cisumbishidi cyònsò cyà Bible, mu

maèkèleeziyà. Nè bambi, nè bikwàbò, biimàne mwaba awu, nè bacibadila pamutùpamutù, kàdi bàcilèngulula, bwà twitabàayi, bàteeta bwà kucyàluja mu cikondo cikwàbò kampàndà.

120 Ànu múmwà mwambè díyi adi, misangu yìbìdì anyi yisàtù kacya ànu ngíkala mu Phoenix, ncitamba kundenga be. Bantu bàtu mùshindù awu. Bàtu misangu yònsò ànu bàtùmbisha Nzambì bwà citùYe mwènzè, nè bindile cyènzàYe, kàdi bàpanga kumanya cidìYe munkaci mwà kwenza mpindyewu mene. Bàdi bènzà nàнку. Bàdi bàpanga kucimòna.

121 Mpindyewu, pàmwàpa Helòòdè ùvwa mwà kwikala mutùmbishe Nzambì bwà mwàkapàtulàYe bânà mu cipèlèl, nè bikwàbò. Nè kwambabò nè: “Dìngà ditùkù Yèyè neatumè Maasiyà. Butùmbi kùdì Nzambì’s wè! NetùMumònè dibà adi.” Kàdi’s ke Yèyè ewu, mwimàne ànu kumpàlà kwàbò mene, kàdi kabàvwa baMumanyè nànsha.

122 “Yèyè ùvwa pa buloba, nè buloba bwàkenjiibwa kùdìYe, kàdi bàà pa buloba kabààkaMumanya to. Kàdi bònsò bààkaMwakidilà abu, kùdìbo. . . wàkabapèèsha bukòlè bwà kulwabò bânà bàà Nzambì.” Mèmè ntu munangè aci. Èyowà’s, mukalenge.

123 Mu Bwikadi Bwèndè amu, ndi ngèèla meeji nè yèyè kààkeelakù meeji nè dísù dikòlè pa bwalu abu to.

124 Nè bààbùngì leelù ewu bàdi benza cintu cìmwècìmwè aci, kabàyi bàcyàngata nè dísù dikòlè to. Kabèèna bàngata meeji à dísù dikòlè to. Bàdi bèèla meeji nè: “Mpindyewu mona, ntu nya mu èkèleeziyà, nè ndi mwìmpè ànu múdì wèwè amu.”

125 Mpindyewu, kwèna ànu muswè kwangata lwidì alu to. Udi mwà kwikala mwìmpè bu mèmè, kàdi kubènga kwikala mwìmpè nànsha kakesè. Nwamònò anyi? Kàdi kanwèna baswè kuvwija muntu nànsha umwe cileejilu cyènú to. Udi muswè kuvwija Nzambì Cileejilu cyèbè, Yesù Kilistò, nè muswè kwangata Díyi Dyèndè. Nènku pawìkalà kùyì. . .

126 Mpindyewu, vùlukàayi nè, Bible mmwàmbè nàнку, lwà mu mukàndà wà Bwàkabuulwibwà amu. Eci ke dibuulula mu kaabujimà dyà Yesù Kilistò. “Ewu yònsò wadidìnga kuumushilaKù Díyi dimwèpelè, anyi kusàkidilaKù díyi dimwèpelè awu, cyèndè citùpà necyùmushiibwè ku Mukàndà wà Mwoyi.” Pa nàнку Aci’s ke Dibuulula.

127 “Nzambì mu bikondo byà kale nè mu mishindù mishilèshilàngàne,” Ebèlù 1: “wàkaakula nè baataatù kùdì baprófetà, kàdi mu matùkù à ndekeelu aa ku Mwan’Èndè, Kilistò Yesù.” Nènku, Kilistò, mwikàle ùDibuulula, ùDimanyisha, wàngata Díyi Dyèndè nè ùDikolesha ànu cyanààna.

128 Mwimàne dìngà ditùkù, munkaci mwà kwakula, ngèèla meeji, nè Mwanèètù Carl Williams nè, kùvwa dibwè dyà ngaji.

Ngèèla meeji nè ùvwà m'Mwanèètù Carl, anyi muntu kampàndà. Ke mèmè nè: “Awu kí mmuci mulenga anyi?”

Yèyè nè: “Èyowà's.”

Mèmè nè: “Ncinyi aci? Butù bwà volcan.”

¹²⁹ Ke cyònsò cidiku ncyôci aci, lupwishi lwà buloba, lwikàle nè mwoyi munda mwàlù. Nè mwoyi awu wùvwà mmwoyi wà mùshindù kampàndà, wàkawènza dibwè dyà ngaji. Mukwàbò ngòwò ewu mwimàne, mmuci wà mùshindù mushiilàngàne. Mmuci wà mfigi. Ncinyi aci? Butù bwà volcan bùfùmina pa buloba, nè mwoyi wà mfigi munda mwàbù.

¹³⁰ Èè, tùtàngilè's. Twètù tudi cinyi? Byà mwomùmwè nè mucì awu, butù bwà volcan, kàdi biikàle nè mwoyi wà muntu munda mwàwù. Nè mwoyi wà muntu awu ngwà pa buloba, nè ùdi nè cyà kwalukila ku buloba.

¹³¹ Kàdi kùdi Mwoyi wùdi wùfùminà mu Dyulu wùdi muntu naawù nè mwoyi ku Mwoyi awu, M'Mwoyi wà Cyendèlèlè.

Mùshindù mwinè wùdibi bikùtàkàne's wè! Katwènaku bafwànyine kwela aci meeji nè dísù dikolè anyi, balundà bàanyi?

¹³² Mpindyewu, kí ndisaluka to. Kí ndilama dyà twitabàayi yàbùngi to. Ndilabula kampàndà. N'Dilediibwa. Dyàmbedi, bikèngela ùlabulè lufù kumpàlà kwà wèwè kumòna mwà kufila bujaadiki bwà Dilediibwa. Bu mùdi, cijaalàmijè mu mùshindù mujaalàme's: wenza dilabula dyà lufù, nè pashìshe kwikala ntèmu wa Dilediibwa. Dimiinu kanà dyònsò edi didi nè cyà kwenza cintu cìmwècìmwè aci. Nènku Dimiinu *edi* didi Nzambi. Nè pàdiDi ditèèkiibwa mu mwoyi wèbè, didi dipàtula Dilediibwa dyà mwànà wa Nzambi.

¹³³ Nènku nè mùshindù awu wùvwà Yesù pàvwàYe pa buloba. Yèyè kwamba nè: “Nganyi udi mwà kuMpiisha bwà mpèkaatù? Nganyi udi mwà kuMbanda, èyowà's, bwà mpèkaatù?” *Mpèkaatù* mbwena kwamba nè “bupidyà.” “Panwikalà—panwikalà kanùyì mwà kungiitabuujà Mèmè to, itàbùùjaayi byenzedi.” “Kenkètaayi Mifundu. Mu Yôyi amu mmunùdi nwela meeji nè nudi nè Mwoyi wà Cyendèlèlè. Yôyi ayi's ke Yidi yimfidila Mèmè bujaadiki. Yôyi ayi's ke Yidi yamba nè Mèmè ndi Nganyi. Nènku pangiikalà nciyi nkumbanangana nè dikùmbanyina adi to, ànu menemene cyàkambà Mifundu aci, cyàkamba Taatù nè Ndi mwà kwikala, pàndi Mèmè ndwa; Mèmè nciyi nkumbanangana naaci to, dîbà adi Ndi mwenze cilèma.”

¹³⁴ Kaa, patwikalà twètù beena Kilistò, twètù bambi, twètù balùme, bakàji, beena Mpenta, nè bakwàbò bònsò bàà ku twètù, patwikalà katùyì mwà kwangata cidì Nzambi mwàmbè nè ke cìvwà Èkèleeziyà Wendè nè cyà kwikala to, twètù katùyì mwà kufika ku cipidì cidìYe mwàmbè to, dîbà adi tudi mwà kupiishibwa bwà mpèkaatù, bwà bupidyà. Tudi tuteeta kwamba nè matùkù à bishimà àkaadi mamanè kupita,

nè bintu bikwàbò byònsò ebi, *cikampàndà*, nè *cikansanga*, nè *cikankènga*, díbà adi tudi mwà kubandiibwa bwà bupidyà. Bwalu, kùdi mpèkaatù ànu umwèpelè, nè mwinè awu mbupidyà. “Ewu udi kàyì wítabuujà mmumanè kupiìshiibwa.” Nwamònu anyì? Kwèna nànsha mwà kufika pa cishìmikidi cyà kumpàlà to pawikalà kùyì wítabuujà. “Ewu udi ulwa kùdi Nzambi ùdi nè cyà kwítabuujà nè Yèyè ùdikù, nè m’Mufuci wa aba bàdi bàMukèba nè lukunukunu.” Pa nàнку ambàbi tũng bu èkèleeziyà. . .

135 Ke cìdi Nzambi muswè ncyòci aci. Ke cìikalà Nzambi naaci aci, musumbà wà bantu bàdi mwà kwamba nè: “Yesù Kilistò wàkalaya cinyì? Ncinyì cìdi cilayìbwe mu matukù à ndekeelu aa cìdi kaciyì cimwènèshìibwe kutùdi?” Amen. Díbà adi tudi mwà kusòmba panshì, kuMuvùluka, kuMuvùluka patùdi tusangila pàmwè.

136 Kwòkò cintu kampàndà citùdi bapangìle, tùcyènzàayi. Kwòkù cintu kampàndà citùpangìke, twàlukilàayi ku cyòci aci. Tùvùlukàayi cyàkalòmbàYe, kí ncutùdi twètù twela meeji nè bìvwa bikèngela bwà twètù kwikala naaci to, kàdi cyàkambàYe nè bìdi bikèngela bwà twètù kwikala naaci. Nwamònu anyì? Bikèngela tucìpetè mùshindù awu, mùshindù wùdiYe mucyàmbe awu. Kàdi ndi ndikonka ní tudi ànu. . .

Twètù tudi twamba nè: “Èè, mèmè—mèmè—mèmè’s ndi wa mu *cikampàndà*.”

137 Ndi ndikonka ní nudi bacyèlekù meeji nè dísu dikolè, bwà kumanya nè aci kaciyèna nè cìdici cyùmvwija kùdi Nzambi to. Aci kaciyèna nè cìdici cyùmvwija to. Helòodè pàmwàpa—pàmwàpa kwambayè nè: “Èè, mpindyewu anjì indilà kakesè kaaba aka. Nudi bamanyè nè mèmè ndi nganyì anyì?” Nwamònu anyì? Yèyè kàakeelakù meeji nè dísu dikolè nànsha. Nènku’s bìvwa bikèngela bwà twètù kwela meeji nè dísu dikolè.

138 Nudi bamanyè cyàkenzàye anyì? Pààkatèèkiibwà Kilistò kumpàlà kwèndè, bwà musangu wà kumpàlà, uvwa bapròfetà bònsò, beena meeji, nè munda mwà bikondo byònsò, bàvwa baakùle bwà Kampàndà uvwa ulwa ewu. Kàdi’s kí Yèyè awu mwimane ànu kumpàlà kwèndè. Nudi bamanyè’s, wèndè. . . kùdi. . . Mu mpungà awu, wuvwa Nzambi mutèèke Kilistò kumpàlà kwà Helòodè, yèyè wàkalòmba ànu dicyonkomojanga.

139 Ndi ndikonka’s, bàna bèètù. Twèlanganàayikù meeji nè dísu dikolè mpindyewu. Twètù beena Mpenta, ndi ndikonka ní tudi tupeta Nyumà Mwimpè ànu bwà dicyonkomojanga. Kàdi’s kùdi citàmbe nè aci cìdi cyènda Nèndè. Kùdi nsòmbelu udi nè cyà kwikala mwenjùibwe. Ndi ndikonka aci ní ki ncipumbishi cyà èkèleeziyà yètù leelù ewu, bàna bèètù. Ndi ndikonka nè ki bwà cinyì tucìdi ànu mùnwemu mu cipèèlà emu, twenda tulalakana, pamutù pàà kwikala mu Buloba bulaya mwàmwa, munkaci

mwà kukòòkesha bintu byònsò. Ndi ndikonka ní kakwènakù cintu kampàndà citudì katùyi beelèleku meeji nè dísù dikolè dikùmbàne pa bwalu abu. Nwamònu anyi? Nudi nè cyà kwela meeji nè dísù dikolè.

¹⁴⁰ Bu Pilaatù wikala mwenze nàнку, ùvwa mwà kwikala muMulekèle. Bu—bu Helòòdè mwà kwikala mwenze nanku, ùvwa mwà kwikala muMumulekèle. Kàdi yéyè kàvwa mwela meeji nè dísù dikolè to, wendè mpùngà wa kumpàlà awu.

Nèнку dìbà adi cyàkenzàye ncinyi? Wàkalòmba bwà kwenzayè àmwè màyelè.

¹⁴¹ Kaa, bòbò, ke cìdiku leelù ewu aci's. Mbaswè kuvwija bwena Kilistò diyelè kampàndà, dijìmbu kampàndà dikesè dyùdi naadi mu cyanza adi. Nèнку, tèèlejàayi, beena Mpenta, ikàlaayi nè meeji matòòke à mu ndòndò mu bintu ebi. Panùdi nwakula mu myakulu, nè nufila dyandamuna, nwikalè batwishìbwe nè ke dyandamuna ndyòdi adi. Nwamònu anyi? Kwikadi nè dijìmbù kampàndà to. Bwà cinyi udi muswè dijìmbù, pàdibi nè Nzambì ùdi nè cintu cilelèlà bwèbè? Nwamònu anyi? Bwà cinyi kwitaba mupinganyi, pàdi maulu mùle tètè nè bintu byà cyà bushùwà. Nwamònu anyi? Nwamònu anyi? Tudi nè cyà kwikala nè meeji matòòke. Kwèna nè cyà kuteeta ànu bwà kucilèngulula nè kucipìcisha to. Katwèna nè cyà kwenza nàнку to. Katwèna nè cyà kulòmba màyelè to.

¹⁴² Tudi nè cyà kulòmba mudimu. Amen. “Mukalenge, byòbì bikèngela bwà mèmè kwikala cikùpwidi cyà makàsà cyà mu ciibi, mvwijèku cikùpwidi cyà makàsà cyà citàmbe bwìmpè cyùtuku Wèwè naaci aci. Cyònsò cìndi nè cyà kwikala aci, ngiikale nàнку.” Kabiyi nè: “Mvwijèku...Mèmè nciyi mwà kwikala Billy Graham, anyi Oral Roberts to, mòna's, ncyàkwikalakù cikwàbò cintu to nànsha kakesè.” Nwamònu anyi? Mòna's, wèwè s'udi mwelela meeji ànu mùdi Billy Graham nè Oral Roberts amu, bu—bu wèwè nè...bu wèwè mwikale cikùpwidi cyà makàsà, wèwè mwikale cikùpwidi cyà makàsà cyà Nzambì. Nzambì ùdi dijinga nè cikùpwidi cyà makàsà; Yèyè—Yèyè mmuswè cikùpwidi cìmpè cyà makàsà. Kwajiki. Nwamònu anyi? Kacyèna nè bwalu to.

Kàdi tudi tutùngunuka, tudicinkila nè tudi nè cyà kwikala *cikampàndà* anyi *cikansanga*. Kwènjikù nàнку to.

¹⁴³ Lòmba wèwè ànu mudimu, cyònsò cìdiku aci. Nwamònu anyi? Cyònsò cìdiku aci, Nzambì àkusungwilè mudimu. Nwamònu anyi? Nèнку dìbà adi pàdiYe ùkupèsha mudimu, vùlukà nè n'Yesù udi mukulombòle mwab'ewu. Udi mulediìbwe mmu kiipàcìlà aku. Ikala mu—musadidi mwìmpè kùdiYe, nànsha mwikàle penyì. Èyowà.

¹⁴⁴ Yesù wàkamba nè: “Bwà cinyi nudi nuMbìikila ‘Mukalenge,’ kàdi kanùyì nwenza bintu bìNdi nnwàmbila bwà kwenza?” Bivwa bikèngela twètù kulonga Mifùndu. Bivwa bikèngela twètù

kujandula cidi bulondyanganyi bwà ndongamu nè ndongamu wa Nzambi. Yèyè nè: “Nudi nuMbiiikila ‘Mukalenge.’” Yèyè nè: “Kàdi bwà cinyi nudi nuMbiiikila ‘Mukalenge,’ panùdi kanùyì nwenza bintu bì—bîNdi nnùtùmina dìyì bwà kwenza?” Nwamònu anyi? Èyowà.

¹⁴⁵ *Mukalenge* mbwena kwamba nè “bwena cintu.” Mwena lupangu ke mukòòkeshi wa—wa lupangu. Nènku bantu, leelù ewu, nebiitabè Yesù nè disànkà dyònsò bu Musùngidi. Kí—kí mbaswè kuya mu ifernò to. Bòbò—bòbò nebàMwitabè bu Musùngidi. Kàdi pàkaadibi bikafika ku nè “Mukalenge,” kaa, to. Huh-uh. Nwamònu anyi?

¹⁴⁶ Mukalenge, mbwena kwamba nè, wèwè udi cintu Cyèndè. Yèyè dijinga nè cikupwidi cyà makàsà, Ùdi ùkuvwiya cikupwidi cyà makàsà. Kàdi udi ànu nè disànkà, bu cikupwidi cyà makàsà, ànu mùdi mwà kwikala, bu mùtootò wà dindà. Nwamònu anyi? Nwamònu anyi? Nwamònu anyi? Nudi—nudi—nudi baswè... Tudi—tudi baswè... .

¹⁴⁷ Katwèna baswè kwikala Nendè bu “Mukalenge to.” Tudi baswè Musùngidi, kàdi katwèna baswè “Mukalenge to.” Pashiishe Ùdi ùlwa bu “Mukalenge,” nè Wàkula neebè pa bintu kampàndà byà Dìyì. “Èè mpindyewu, ncyèna—ncyèna mumanyè Aci mpindyewu to, nwamònu’s. Èè, ànu... .Ncyèna ànu mwà kudifwànyikijila mémè ewu ngènta Aci to,” nwènu bainàbànzà aba.

Udi wamba nè, nêngiikale mwà kucyòka paanyimà pàà katanci. To. Mémè to.

¹⁴⁸ Nêngiikalè mùvwà muntu awu mwámbe musangu kampàndà awu nè, wàkaya kayiisha ku ditàbuluja kampàndà. Wàkamba nè wàkayiisha pa kanyinganyinga; dilòlò diisàtù, kanyinganyinga; dilòlò diinàyì, kanyinganyinga. Wàkayiisha lumingu lujimà pa kanyinganyinga.

¹⁴⁹ Ke mpaasàtà wa èkèleeziyà nè bàmwè bàà kùdibo, kwalukilabò nè kuyiikila nendè, bamba nè: “Mwanèètù, ncyà bushùwà nè tudi—tudi twanyisha diyiisha dyèbè. Kàdi kwènàku nè dikwàbò anyi?”

¹⁵⁰ Yèyè nè: “Kaa, èyowà’s, mukalenge.” Yèyè nè: “Ndi nè dikwàbò. Kàdi bòbò bònsò bânji banyingalalè, pashiishe nényiishè pa cintu cikwàbò.” Pa nàнку, èyowà’s, mukalenge.

¹⁵¹ Èkèleeziyà ànji kubangila pa ABC wendè. Pashiishe netùye ku makùmi makolè dibà adi, mùshindù—mùshindù wà kwikala baprófetà, nè kupeta mapà, nè bikwàbò byà mùshindù awu. Kàdi twànji kuyiila dyàmbedi cidya cyà kumpalà eci, dyàmbedi. Kuyiila bwà kwenda kumpalà kwà wèwè kumòna mwà kunyeema lùbilu, nudi bamanyè’s. Pa nàнку, kàdi wèwè muzengèle nè mwendi wa lwà makàsà, newènzè cinyi? Èyo.

152 Kàdi tudi—tudi baswè kuvùluka Mukalenge wetù. Ke cidi cìkèngela bwà wèwè kuvùluka ncyòci aci, nè n'Yèyè ùdi ukwàcila mudimu awu. Kwèna upeta mapà aa ànu bwà kuàpetela masanka àbùngi ku ôwò. Ncyà bushùwà's. Ndekeelu wa byònsò, kùdi bààbùngi bàdi bààkula bwà mapà, bàndi mutwishiiibwe, bwà mùshindù wùdìbo bènza maalu, nè kí mbamanyè nè ncinyi to. Nwamònu anyi? Nwamònu anyi?

153 Dipà, mapà à Nzambi, nè bikwàbò, kí ncintu kampàndà cyùdi ànu unàya naaci nànsha. Mapà à Nzambi à mushinga mukolè, kàdi's àdi àzengesha. Àtu àcyòkesha be. Yak- ka... Mu Bwikadi bwà Nzambi, kí ndyela dyà mbilà to. Bwikadi bwà Nzambi, aci's cidi ànu mabènesha à Nzambi àdiYe ùpòngolwela pambidi pèèbè, nwamònu's, kàdi Bwikadi bwà Nzambi ncintu cyà citàcishangana.

154 Ncyèna muswè nupwe mwoyi bwà kupeta mukàbà wà méyi awu to, nwénù nè mùshindù, *Bakalenge, Tudi Dìbà Kaayi?* Nènku nwàvùlukaayi aci.

155 Yakòbò, pàvwàye mulààle pa musààmù awu, lubwebwe alu, dilòlò kampàndà. Ke Mukalenge kumumwènekela mu cìkèenà-kumòna, nè kumònayè Banjèlò bàpweka nè bàbànda. Pààkajuukàye kuulu, wàkamba nè: “Ewu mwaba ngwà wùkwàcisha bwòwà, kí mmwaba mukwàbò to ànu nzùbu wa Nzambi.” Mwaba wà wùkwàcisha bwòwà's!

156 Pààkamba Yeshàayi mupròfetà cipròfetà munda mwà bidimu byàbùngi, mu bukòkeshi bwà Uziyà. Nènku pààkuumushiiibwa Uziyà kùdiye, bwalu wàkateeta bwà kwangata kaaba kàà mwakwidi, kàdi wàkatuucika nè nsudi è kufwàye. Nè pàmwàpa Yeshàayi ùkaavwa pàmwàpa nè bidimu makùmi ànaayi, makùmi àtaanu. Nè yèyè ùvwa mupròfetà, kaa, kacya ànu ku bwànà, bwalu bapròfetà bàdi bàlediibwa nànkù. “Mapà àbò nè mabiikila kí mbyà dinyingaleela to.” Nènku's ke yèyè awu, mu—mupròfetà wa Mukalenge, lwà kwìnshì aku, munkaci mwà kusambila, dngà ditùkù, nè ùtonda mpèkaatù yèndè ku cyoshelu.

157 Ke dyàkàmwè, kubwelayè mu Bwikadi bwà Nzambi, nè kumònayè Nzambi musòmbe mu Dyulu, nè luzemba lwà cilùlù Cyèndè. Wàkamòna Baselèfimà nè mpàlà Yàbò yà cijila ayi mibwikidija kùdi mapwàpwà, nè makàsà Àbò mabwikila nè mapwàpwà, nè bàbùuka nè mapwàpwà, bèèla mbilà nè: “Wa cijila, wa cijila, wa cijila, Mukalenge Nzambi wa Bukolè bwònsò.” Èyowà.

158 Ke Yeshàayi kuvùluka dībà adi nè lwendu lwèndè lukesè alu kalwàkadi lwimpè bikolè to. Wàkeela lubilà kaayi? Ùvwa mumanyè nè, dipà dyèndè—dyèndè, yèyè kààkenza naadi maalu mu mùshindù mujaalàme nànsha. Ùkaavwa mulalùke bikolè be. Kwambayè nè: “Mukalenge, ndi muntu wa mishikù mibiipe, nè ndi—ndi—ndi musòmbèle munkaci mwà bantu bàà mishikù

mibiipe.” Ke pashiishe Mwanjèlò . . . Nwamònu’s, ncintu cyà cìkwàcisha bwòwà. Yèyè kwamba nè: “Dyakabi dyanyi.”

159 Kí ncintu cyà dibenesha, nè dyela dyà mbilà, nè dyela dyà mikunda to. Abi mbimpè. Mpindyewu, vùlukaayi nè, ncyèna munkaci mwà kupiisha abi to. Kàdi, ndi nnwàmbila nè, kí ng’aci cìndi ngàmba to.

160 Mbukolè nè Bwikadi bwà Nzambi, bùdi bùtwàla diciina dyà cijila, mu mùshindù wà upanga bukolè mu Bwikadi Bwèndè. Neùvùlukè misangu yònsò. Udi ànu ucivùluka.

161 Ke Yeshàayi kuvùlukayè, matùkù èndè ónsò à mwoyi. Ndi ndifwànyikijila nè, pàvwà scie munkaci mwà kukòsa mubidi wèndè, yèyè ùcivwa ànu muvùlùke mùvwà Banjèlò abu bèèla mbilà nè: “Wa cijila, wa cijila, Mukalenge Nzambi!” Cyà bushùwà’s.

162 Yakòbò, mu mèbà èndè à ndekeelu, ùvwa mwà kuvùluka mùvwà Banjèlò abu bàbànda bàpweka, nènku civwa ncintu cyà cìkwàcisha bwòwà menemene kùdiye.

163 Kí ncidi bantu bèèla meeji nè ke cyòci to. Ncintu kampàndà cyà cishiilàngàne. Cìdi cìtùkèngelà kwenza nkubwela mu Bwikadi Bwèndè, kuMuvùluka, bwà nè kí mMutùtwàle apa bwà kunaya nè kusangulujangana to, kàdi mbwà mudimu, mmutùtwàle mwab’ewu bwà—bwà kuMukwàcila mudimu.

Ùvwa nè cintu kampàndà cyà kuvùluka.

164 Kàdi bishi bwà Yudaàsà Mpongoloki awu? S’ùdi nè cintu kampàndà cyà kuvùluka, yèyè pèndè. Yudaàsà ùdi nè cintu kampàndà cìdiye ùvùluka dilòòlò edi. Ncyà bushùwà nè bìdi nànkù. Nè neikalè misangu yònsò ànu ùcivùluka. Cyà bushùwà. Bwà cinyi? Wàkasumbisha Mukalenge Yesù bwà dipeta dyèndè sungasunga.

165 Ndi ndikonka, dilòòlò edi, ní kakwènakù bààbùngì bàdi munkaci mwà kwenza cintu cìmwècimwè aci leelù ewu, nusumbisha bukenji bwà bwanaàabutè bwènu bwà dipeta dyènu sungasunga, díbà dinùvwà nè cyà kwikala nulàkuka kapyà bwà Kilistò. Pàvwàbi bikèngela bwà wènu kwikala nuMwenzela cintu kampàndà, nuMukwàcila mudimu, anyi cintu kampàndà, ujuuka uya ukashàala wa mu mwaba kampàndà wùdi mwà kwikala nè nsòmbelu wa mùshindù kanà wònsò wùdi muswè awu kàdi mwikàle ànu ulàka mukana wamba múdi mwena Kilistò. Aci’s ke cìdi bàà pa buloba bàkèba dilòòlò edi. Bàà pa buloba, mùndi ngàmba, kí mbeena kwitabuuja to.

166 Mwena kwitabuuja ùdi ùkèba njila yònsò mululàme udiyè mwà kwendelamù awu, bwà kudilongolola.

167 Kàdi mwena bupidyà ùdi ùkèba mwaba kampàndà wùdiye mwà kuya nè kutungunuka ànu nè kwamba mùdiye mwena Kilistò, kàdi pashiishe kwikala ànu nè nsòmbelu wa mùshindù wùdiye muswè awu. Ke cìdi ditunga edi dijinga bu mfumù wa

ditunga aci, nènku's ke cidibo bapetè. Menemene. Ke cidì—ke cidì èkèleeziyà muswè, ke cidibo bapetè. Èyowà's, mukalenge. Ke cinùdi nupeta ncyôci aci.

¹⁶⁸ Kàdi mwena kwitabuuja mmuswè kudipòòpola ku bintu byònsò. “Mmuswè kutèeka mpèkaatù yònsò ku luseke, nè bujitu bùdi bumujìngile ànu bipeepèlè nùnku; bwà wàmòna mwà kunyeema nè lutùlùlù lwònsò lubilu lùdi lutèèkiibwe kumpàlà kwèndè alu, mutàngile kùdi Mubangi nè Mujikiji wa Diitabuuja dyètù, Yesù Kilistò.” Èyowà's. BàMuvùluke, patùdi tutèeka ku luseke bujitu bwònsò apa. Bakàji bàlekela nsuki yàbò yileepa. Balùme bàlekela kwikala ba-Ricky, nè bàlwa mu èkèleeziyà nè bènza cidì cìmpè, nè bintàkanyì byà mìshindù mikwàbò yònsò ebi. Nè bampaasàtà nè balami mu kasùmbù kààbò amu, basèlàngane misangu yisàtù anyì yìnaayi; nè bintu byònsò ebi, bàdya cibàngà, bwalu bantu abu bàdi bèèla mfrangà yàbùngì mu cibùcilu nè bikwàbò; bikèngela kwìnamina ku bulongolodi kampàndà bwalu bàdi bàkwambila nè *cikampàndà* eci ke Cyôci, pèndè Bible wamba cintu kampàndà cyà cishìilàngàne. “Tèeka ku luseke bujitu bwònsò.”

Vùlukà Yesù. Yèyè wàkalwa kàyì mutàmbe kunangiibwe to.

¹⁶⁹ Laabi wa citende awu ùvwa Umwe wa ku Bantu bàà batàmbe bunène pa buloba, mu ditùkù òvwàYe wòndopa babèèdi nè wènza bintu byònsò bìmpè adi, òndopa bantu, nè ùtàbeeja mpofo, ùleeja bantu maalu, nè ùleejila Nzambi kùdibo, ku meeji à mu mutù wàbò sungasunga. Yèyè ùvwa mwà kwakula naabò. Yèyè ùvwa Laabi munène.

¹⁷⁰ Kàdi dīngà ditùkù kusòmbaYè panshì nè kubanga kubàmbila Bulelèlè bwà Èvànjeeliyò. Kubangila ànu apu kàcivwa kàbìdì nè luumù to. To, Yèyè kàcivwakù kàbìdì naalù to. Katanci aka anyì, ke musùmbà mujimà awu kuumukawù. Ke dībà adi makùmi mwandamutekète kwambabò nè: “Edi's ndiyi dikolè be. Nganyi udi mwà kudyùmvwa?” Ke bòbò kuya.

Pashìishe kajuukaYè nè kukonka bayiidi nè: “Nudi pèènú baswè kuya anyi?”

¹⁷¹ Bàakamba nè: “Kutùdi bafwànyine kuya nkwèpi, Mukalenge? Wèwè, nkààyeèbè. Tudimù lukàmà pa lukàmà. Tudi badìlongòlòle, nànsha ciikàle cinyi. Tudi badìlongòlòle bwà kuya.” TùMuvùlùkaayi mùshindù awu.

¹⁷² Vùlukàayi nè, Yèyè nguvwa Cileejilu cyètù. Wàkenza bintu byònsò, wàkapiisha Mùfaalèsà yònsò, wàkapiisha bintu byònsò byà pa buloba, wàkapiicila pa buloba kàyì katòba pa Yèyè to. Yèyè's ùvwa Mwànà wa mùkòòkò mukenketa kùdi Nzambi. KwambaYè nè: “Ewu m'Mwan'Àanyì munanga. Ndi musànkishiibwe bikolè munda Mwèndè.” Ùvwa nè nsòmbelu wa mùshindù awu.

¹⁷³ Nè pashìishe Yèyè kwangata mpèkaatù yònsò wa bàà pa buloba, mpèkaatù wanyì nè mpèkaatù webè, nè kuMutenteka

pambidi Pëndè. Nè pashiishe mene cisùùlùlù cyàkapàtukà mu mpàlà Wendè wa cijila awu, bu mamata à Mashì, àsàmpukila mwaba awu. Kí mbwà nè Ùvwa mupiiile to, kàdi òvwa ndipiilà dyànyì dyàkadì dyènza nàнку, nè dyèbè dipiilà's.

174 Nèнку piiikalàYe mwà kwenza nàнку bwèbè wèwè nè mèmè, mmunyi mutùdiku mwà kwimana mwínshì mwà mèyi maswika kampàndà nè lukutukutu lwà pa buloba, nè bintu byà ditùkù dyà cyena leelù edi? Bivwa bikèngela twètù kuvùluka Mukalenge wetù, kuvùluka cidìYe mufutè bwà mushinga wà lupàndu ewu. Katwikadikù nè bundu bwà bwalu abu to. “Ikala pabwipi bwà kupèesha muntu kanà yònsò mulubù bwà ditekemena didi disòmbe munda mwèbè adì.” Bivwa bikèngela twètù kwenza nàнку, bânà bèètù.

175 Tukàadi twenda tubwela mu mèbà à ndekeelu mpindyewu. Dìbà dikaadi dyènda dìbwela. Dishidimuka ndifùmìne ku Esètè. Mpindyewu didi ku Côte Ouest. Kadyèna mwà kuya kule kutàmba menemene to. Mukàlù ùdi kwàka, nè mpèkaatù yònsò wa pa buloba ùdi munkaci mwà kungwila mushiki, nè ùbùngulukila mu mavwala à bundù à Hollywood. Mmwalùkile buludì mu èkèleeziyà. Nèнку ncikondo kaayi's wè! Bivwa bikèngela twètù kuvùluka aci, bânà bèètù.

176 Vùlukàayi Mukalenge wetù. Ncinyi civwàYe mufwànyine kwenza bu Yèyè mwà kwimana kaaba aka leelù ewu? Nùнку's mmushààle mukwàte ku Dìyi adì. Munkaci mwà diteeciibwa dyònsò, Yèyè ùvwa mwà kushààla Dìyi adì. Yèyè wàkacyènza. Yèyè ùvwa Cileejilu cyèbè.

177 Pààkalwà Sàtaanà kùdiYe nè kwamba nè: “Andàmùnà mabwe aa àlwe màmpa,” Yèyè wàkambà nè: “Bààkafùnda nè. . .” Nwamònu's, dìbà dyònsò ànu nè Dìyi dyà Taatù. Tudi nè cyà kuvùluka nè kwenza cintu cimwècimwè aci. Yèyè nguvwa Cileejilu cyètù. Èyowà's, mukalenge.

178 Baakwidi bàà mu ditùkù adì abu nebiiikalè nè byàbùngi byà kuvùluka, bòbò pààbò. Bàdi munkaci mwà kucivùluka dilòlò edi mu mwaba wà bajimìne.

179 Wèwè udi wamba nè: “Mwanèètù Branham, udikù mufwànyine kubiiikila baakwidi abu. . .? Baakwidi bàà cijila, nè, bàvwa bantu bàà difwànà dyà Nzambi.”

180 Mpindyewu, anji indilaayi kakesè. Bààkadivwija bòbò biinè bàà difwànà dyà Nzambi. Bàvwa nè cijila cyà mafi, difwànà dyà Nzambi òvwa kadìyi bulelèlè dyà kùdi Nzambi to. Yesù wàkabàmbila ànu patòòke nè: “Nwénù nudi bàà tatwénù dyabùlù, nè byenzedi byèndè ke binwènza.” Nè Yèyè wàkabàmbila civwàbo. Nè bàdi nè byàbùngi byà kuvùluka, bòbò pààbò. Bwalu, pààkamònàbo dimwènèshiiibwa dilelèlè dyà Maasiyà adì, dijaadika nè Yèyè ùvwa Maasiyà, bààkaCibènga nè budiswilè bwònsò bàmba nè Civwa nyumà mubi uvwa wenza nàнку. Bòbò nè: “Civwa m'Beelèzèbulà.”

¹⁸¹ Ke Yesù kwamba nè aci cìvwa ndipenda dyà Nzambi. “Ewu yònsò wíkala mwà kwakula dìyì dibi bwà Nyumà Mwímpè awu kààdyàkufwidiibwakù luse to.” Bàdi nè byàbúngì byà kuvùluka. Katwàngaci kaaba kààbò to, bânà bèètù. Cilumbù cyètù kaciikadi mùmwe nè cyàbò to.

¹⁸² Kàdi byòbi bikèngela mémè kwikala, ngiikalèku bu Natànaèlà, ngàmbe nè: “Wèwè udi Mwànà wa Nzambi. Udi Mfùmù wa Izalèlà.” Ngìimanèku bu umwe wa ku bôbò abu. Ndekèlè ngìimanè.

¹⁸³ Nwènu bakàjì nwìmanè bu mukàjì wa ku ciinà cyà màyi awu, mùdiye mwimàne dilòòlò edi amu. Ùdi nè byàbúngì byà kuvùluka, mutùvwa tucyàkula’s. Wàkapeta mpokolo kampàndà.

¹⁸⁴ Nènku mpindyewu, baakwidi abu, nebiikalè nè... Bàakacyènzà bwà cinyì? Bwà mukàwu ànu wètù wàà menemene ewu. Ke mùshindù wùmwepelè ngwòwò awu. Bàvwa nè lukunukunu bwà twitabàayi wabò. Ke mùvwàbo. Bàvwa nè lukunukunu bwà bilèlè byàbò. Bakùlù bààbò bààkatèeka cilèlè cìvwa cibèngangana nè Dìyì, kàdi’s bàvwa nè lukunukunu bwà bilèlè abi.

¹⁸⁵ Bânà bèètù, wèwè nè mémè katùlù kulumbulula bwà aci nànsha, lukunukunu lwà cilèlè kanà cyònsò. Tùvùlukàayi Yesù, cìvwaYe aci. Shààlaayi nè cyàkambàYe. Ànu ku mukàwu wètù wà bulelèlà ewu, bààkenza bintu ebi. Kaa, cintu kaayipu’s wè! Èyowà’s, mukalenge. Bòbò... .

¹⁸⁶ Muntu mubanji awu ùdi nè byàbúngì byà kuvùluka, yèyè pèndè. Wàkapèebwa mpùngà wa kwakidila Yesù Kilistò, kàdi yèyè ùvwa munangè butùmbi bwà bantu kutàmba butùmbi bwà Nzambi. Nènku, vùlukàayi nè, Bible ùdi wàmbe bitòòke tòò nè yèyè wàkacivùluka paanyimà pàà yèyè mumanè kufwà nè mu ifernò, ke mukenji kwalukilawù kùdiye nè: “Vùlukàà nè, mu matùkù èbè ònsò à mwoyi, wèwè uvwa mupetè mpùngà.”

¹⁸⁷ Nè wèwè Phoenix, udi mupetè mpùngà awu. Bàà pa buloba bàdi nè mpùngà. Kanùcilekèdìku cìpìcila mu kajila kèènu kàdi nupanga kucimòna to, mwàkenzà Helòòdè nè—nè—nè bààbúngì bàà kùdìbo.

¹⁸⁸ Mpindyewu, bàdi bàleeja nè baakwidi abu bàvwa cyà bushùwà bamanyè nè Yèyè ùvwa Nganyi, bwalu Nikòdemè wàkacyàmba pàakalwàye. Ùvwa umwe wa ku bamfùmù bàà Bàfaalèsà. Wàkamba nè: “Laabi, tudi bamanyè nè Wèwè udi mulongeshi mufùmìne kùdì Nzambi, bwalu muntu nànsha umwe kèna mwà kwenza bintu abi Nzambi Yèyè kàyi nendè to.” Nwamònu’s, bàvwa bacimanyè. Kàdi, nwamònu’s, bàdi nè cyà kuvùluka aci. Bàvwa bamanyè cìvwa cìmpè, kàdi kabàakacyènzà to.

¹⁸⁹ Ulekela twitabàayi webè awu ùkulamina panshì, kule nè dibàtiiza dyà Nyumà Mwímpè, bwalu bàdi bàkwambila nè cintu bu nànkù kacitukù to.

190 Mwab'ewu kùkaadi ndambù wa ngondo, mvwa nsanganyibwa ku lùpitaadi bwà kusambidila mukàji kampàndà, mu cimenga cyètù mu Indiana. Kàdi kùvwa inábànzà kampàndà mutekète mulàadika mwaba awu, muswè kuditèeka mu bulongame nè Nzambi. Yèyè ùvwa. . . Ùvwa muntu mutwè cimpingà. Musangu kampàndà ùvwa ùya mu èkèleeziyà wanyì. Yèyè kupàtuka kwalukila. Nè, mu bushùwà bwà bwalu, démons mwandamutekète kubwelayì, mitàmbe bubì kupita mwàkadiyi kwònsò eku. Nènku ke yèyè awu mulàale, mu lùpitaadi, ùpunga nè lufù.

Yèyè nè: “Mwanèètù Branham, ncyèna muswè kufwà mùshindù ewu to.”

191 Ki mémè nè: “Èyo, mwanèètù wa bakàji. Kabyèna bikèngela bwà wèwè kufwa nàнку to, pawikala ucidi ànu nè dijinga mu mwoyi wèbè bwà kukwàcila Nzambi mudimu. Kacya Yèyè kî mmukushiyekù to. Wèwè nguvwa muMushiyè, kàdi Yèyè kî mmukushiyekù to. Mpindyewu udi mwà kucyènza, bu wèwè mwà kucyènza.”

Yèyè nè: “Ndi—ndi muswè nàнку, Mwanèètù Branham.”

Mémè nè: “Èyo, netùsambilè.”

192 Kwàkadi inábànzà mukwàbò mulàale mwaba awu, nè mishiku milembèlèlè, kuntàngilayè nè. . . byenze bu ùvwa mwà kungeela lubilu, nè yèyè nè mwanèndè wa balùme. Ùvwa mulàale pa bulàalu; mupandiibwe, ditùkù divwà didyànjiè. Ke mémè kwamba. . . Ke mémè kumumòna, ùtàngila mwanèndè wa balùme, untàngila.

193 Ke—ke mémè nè: “Bìdi mwà kukutàcisha bu twètù mwà kusambilakù anyi?”

Yèyè nè: “Pwekèshà ridô awu.”

Mémè nè: “Èè, ndi. . . Udi mwena kwitabuuja anyi?”

Yèyè nè: “Ngambi nè: ‘Pwekèshà ridô awu’s.’”

Mémè nè: “Mémè’s ndi ànu mukukônkè.”

Yèyè nè: “Ndi muswè bwà ùmanyè nè, twètù tudi ba-Méthodistes.”

Mémè nè: “Èè, ncyà bushùwà nè aci cidi cicyàmba patòoke dibà adi, nwamònu’s.” Nwamònu anyi?

194 Cìvwa ncyinì aci? Kàvwa muswè kumòna muntu mukwàbò, mukàji mukwàte nè byà luse, mutwè cimpingà awu wàlukila kùdi Nzambi to. Mpindyewu, bu yèyè Méthodiste, bìvwa mwà kwikala bishiilàngàne, nudi numòna’s. Kàvwa muvùlùke Yesù mwaba awu to, nudi numòna’s. Yèyè wàkavùluka ànu twitabàayi wendè awu.

195 Vùlukàayi ànu cyanàànà. Èyo. Kaa, ncintu kaayi cyà cyènza bwòwà cìikalàku mu Ditùkù dyà Cilumbulwidi adi’s wè.

mwoyi bwà kashidi; basòmbe mu myaba yà mu Dyulu mu Kilistò Yesù, bamanè kubiishiibwa pàmwè Nendè ku bafwè. Eyowà. Ncintu kaayi cyà butùmbi cidìci bwà kwikala basòmbe mu myaba yà mu Dyulu nè—nè Yesù Kilistò, Mwànà wa Nzambi's wè! Eyowà's, mukalenge. Tudi mwà kuMuvùluka mpindyewu, nè milayi Yendè yònsò yidiYe mutwènzèle, patùdi basòmbe mwab'ewu mene mpindyewu apa.

²⁰³ Mvwa munkaci mwà kutàngila ku ntankù wa ku cimanu uvwa paanyimà apu, kè mèmè kudyàmbidila nè: “Ekèlekèle, ndi bîmpè be. Ndi munkaci mwà kujikija mwab'ewu mpindyewu, pa dîbà mwandamutekète jaajaaja.” Ncivwa nè mabèji matwè ku àsàtù makwàbò à tuntu tufunda, kàdi mèmè kuàluja mwînshi *mwàmwa*. Ndi mwenze ànu ntàngila ku dîbà dyànyi dyà ku dibòkò, nè mèmè kumòna nè kacivwa dîbà mwandamutekète jaajaaja to. Ke mèmè kudyàmbidila nè: “Ndi mulamè dîbà bîmpè menemene.” Mvwa penyi's? Mvwa mujimìne dîbà dyònsò edi anyi? Mvwa mumanyè nè mvwa—mvwa mudyùmfwè bîmpè byà menemene, kàdi ncivwa mumanyè nè mvwa mudyùmfwè bîmpè byà nanku to. Nènkù—nènkù mvwa mwà...Mvwa ànu mutungùnuke nè kutàngila ku ntankù awu, kè mèmè kudyambidila nè kùdi cintu kampàndà cibì, mwaba kampàndà.

²⁰⁴ Èè, ke ciikalà mwà kwenzeka, òmwè dyà ku matùkù àdi panshi aa, balundà bàanyi. Cikondo neciimanè. Nènkù netwàsè lwendu lwètù mu maulu ètù tubwela mu Cyendèlèlè, mùdi kamùyì kàbìdi cikondo to. Kabyàkwikalakù bilenga bilaya anyi?

²⁰⁵ Kàdi patùdi basòmbe kaaba aka mpindyewu apa, mwaba wùdi cikondo kaciyi nè mushinga kutùdi to, tukàadi bamanè kubàndishiibwa mu myaba yà mu Dyulu. Tudi mwà kuvùluka cinyi? Tudi mwà kuvùluka mulayi wònsò wùdiYe mutwènzèle. “Nwènù bashààle munda Mwànyi, nè Dîyi Dyànyi diikale munda mwènù, nudi mwà kulòmba cinùdi baswè.” Ncyà bushùwà anyi?

²⁰⁶ Ndi mwà kuvùluka Yone Munsantu 5.24 nè: “Ewu udi umvwa Mèyi Àanyi, nè wìtabuuja,” kàyì wìtabuuja byà budingìbudingì to, mpindyewu, kàdi, “wìtabuuja Ewu udi muNtùme, ùdi nè,” aci ndìbà dyà mpindyewu, “Mwoyi wà kashidi, nè kàakupìcila mu dipiishiibwa dyà Cilumbulwidi to, kàdi wàmanyi kuumuka ku lufù wáyi ku Mwoyi.” Nènkù tudi nè mwoyi mpindyewu mene mu Kilistò Yesù, basòmbe mu Dyulu. Ke cyàkalayaYe aci's. Tudi mwà kuvùluka.

²⁰⁷ Tudi mwà kuvùluka mwàkambàYe, kuDimanyisha Yèye mwinè bu Maasiya munkaci mwà bantu. Beena kwitabuuja bàakacimòna. Nènkù tudi tuvùluka nè, mu Yone Munsantu 14.12, Yèye wàkamba nè: “Ewu udi ungiitabuuja Mèmè, byenzedi bìNdi ngèza yèye neabyènzè pèndè.” Tudi mwà kuvùluka nè Yèye ngwàkalaya aci.

²⁰⁸ Tudi mwà kuvùluka nè Yèye wàkalaya mu matùkù à ndekeelu nè Nyumà Mwimpè neàmweneshiibwè mu mubidi wà

buntu, ànu menemene mwàkenzàYe ku Sodomà kumpalà kwà kwoshiibwayè amu. Tudi bavùlùke nè Yesù wàkenza mulayi awu. Mémè ndi mucivùlùke. Yèyè ngudi mwambè nàнку. Yesù ngudi mwambè nàнку. Mémè ndi nciitabuujà, ànu bu nè mvwa musòmbe mwaba awu mene nè Yèyè mungambile bwalu abu, bwalu cìdi *Apa* mene, nènku mùshindù awu ke wùndi mémè ngiitabuujà Dìyì adi. Ndi mvùluka nè Yèyè ngudi mwambè nàнку. Kwàjikì.

“Byenzedi bìndi Mémè ngènta yèyè neàbyènzè pèndè.”

²⁰⁹ Ndi mvùluka nè, mvwa mbala mu Mifundu, dilòòlò kampàndà adi, mwaba wàkambà Yesù nè: pàdìbi nè: “Ndi nè maalu àbùngì à kunùbuulwila, kunwàmbila, kàdi nwènù. . . Ncyèna mwà kucyènta mpindyewu to. Kàdi piikalà Nyumà Mwimpè mulwè, nudi numòna’s, Yèyè neàlujululè bintu ebi ku civùlukilu cyènù, nè pashiishe Yèyè neànùleejè maalu àcilwalwà.”

²¹⁰ Ndi mvùluka nè Nyumà Mwimpè wàkaakula wàmba nè: “Dìyì dyà Nzambì nditwè kutàmba mwelè wà mvità wà nseke yìbìdi, dibwela ditùbula too nè ku bwongò bwà mifubà, nè n’Dijinguludi dyà meeji nè mapàngadika à mu mwoyi.”

²¹¹ Ndi mvùluka nè Yesù wàkopicila mu musumbà wà bantu dīngà ditùkù, ke mukàjì mukesè kampàndà kulengayè civwàlù Cyèndè. Ke yèyè kupàtuka kwàka è kusòmbela panshi, nè pambèlu apu, kujuuka kuulu, anyi kwònsò kùvwàye ùsanganyiiwà aku. Kè Yesù kukùdimuka nè kwamba nè: “WàNdengì awu nganyi?”

²¹² Pàvwàbi nè, Peetèlò ùvwa wèla meeji nè Yèyè kàvwa nè meeji Èndè mu òwù to. Yèyè kwamba nè, èè, kuMutàndisha wàmba nè: “Èè, bantu bònsò’s nyéwù bàKulenga.”

²¹³ Yèyè nè: “Kàdi Ndi njingulula. Ndi ndyùmvwà nè butekète. Bukolè mbulòpòke.” KukènzakanaYè eku nè eku, kusanganaYè mukàjì mukesè awu, kumwambila nè dīsaamà dyèndè dyà mashi àlwa munda adi, diitabuujà dyèndè dyàkamusungila.

²¹⁴ Ndi mvùluka nè Bible ùdi ùlongesha, mu Ebèlù nè, Yèyè ùdi mpindyewu Mwakwidi Munène, kaa, udi mwà kulengiibwa kùdi dyumvwà dyà mateketa ètù. Ncyà bushùwà.

²¹⁵ Ndi mvùluka nè Bible mmwambè nàнку, mu Ebèlù 13.8. Ndi mvùluka Yesù. Wàkenza . . . Mu Ebèlù 13.8, Yèyè mmwambè nè: “Yesù Kilistò ùdi umwèumwè awu makèèlèlè, leelù, too nè kashidi.” Kaa, mùshindù mwinè wutùdi mwà kuMuvùluka’s wè! Èyowà’s, mukalenge. Kaa, mùshindù mwinè wutùdi . . .

²¹⁶ “Mu katanci kakesè bà pa buloba kabàakuMmòna kàbìdi to; kàdi nwènù nenùMmòne,” Èkèleeziyà, mwena kwitabuujà awu, “bwalu Nèngiikalè neenù, munda mwènù mene, too nè ku ndekeelu kwà buloba.” Ncyà bushùwà. “Ncyàkunùshiyakù to.” Kaa, kacýèna ànu cintu kampàndà cìdi cyènzekà leelù ewu

nè mààlabà ciyè to. Ncyà Cyendèlèlè. “Ncyàdyàkunùshiyaku to. Ncyàdyàkunùlekelaku to.” Kaa, ekèlekèlè! Aci’s ncifwànyine kutùfikisha ku dyela mbilà, kwela mbilà, kudila mwadi.

²¹⁷ Tudi baswè kutàngila bwalu ebu nè dîsù dikolè. Vùlukàayi Yesù, kî ng’ànù mu mùshindù wà ku mpùùkàpùùkà to. Yèyè ngudi mulayè nùnkù. Kàdi aci cyôci kaciyi cîmpè to, dîbà adi Bible kî mmwîmpè to. Kàdi dîbà adi citùdi basòmbèle kaaba aka ncinyi? Citùdi mene biikàdile nè mwoyi ncinyi? Cyùdi uteetela ncinyi? Diditàcisha dyèbè ndyà cinyi? Cyùdi ukwàcila mudimu mukolè nànkù ncinyi? Cyôci ciikàle cijaalàme, nànsha mu kantu kàmwè, cìdi anyi cijaalàme mu kantu nè kantu anyi nànsha kàmwè kàà ku cyôci kî nkajaalàme to. Vùlukàayi nè, kàvwa ngwèwè anyi mèmè, anyi bampaasàtà bèènù, bàvwà benzè mulayi awu nànsha. Yesù ngwàkenza milayi eyi. Ndi mvùluka nè Yèyè ngwàkacyàmba.

²¹⁸ Ndi mvùluka nè Yèyè wàkamba nè: “Ndàayi pa buloba bujimà nùkayiishè cifùkiibwà cyònsò Èvànjeeliyò.” Too nè penyi? “Pa buloba bujimà.” Èyowà. Byàbisàtù bibidi byàbù kî mbyanjì kumanya kantu nànsha kàmwè pa bwalu bwà Kilistò to. “Buloba bujimà, kùdi cifùkiibwà cyònsò. Bimanyinu ebi nebifilè aba bàdi biitabuujà.” Ndi mvùluka nè Yèyè wàkamba nànkù. Bu mèmè mwà kuvùluka aci, mmunyi mùndiku mwà kwitaba cintu kampàndà, dîbà adi, cìdi cyàmba nè ditùkù adi ndiyè? Ndi mvùluka nè Yèyè wàkamba nè: “Pa buloba bujimà, cifùkiibwà cyònsò. Nè bimanyinu ebi nebifilè aba bàdi biitabuujà.”

²¹⁹ Mmunyi mùndi mwà kuditèeka nè kasumbù kàà bantu bàdi bàpidya Dîyi adi, pàvwà Nzambì ùtàngila Dîyi Dyèndè, bwà kuDishindika? Mmunyi mùndi mwà kudiswikakaja nè beena bupidyà?

²²⁰ Éyi Nzambi, ndekèlè mvùluke Yesù. Ndekèlè mvùluke ngiimànyinù wakangataYè. Ndekèlè mvùluke nè Yèyè ùdi Musùngidi wanyi. Ndekèlè mvùlukè nè ndi mufwè. Neicyènàku kàbidi to. Ndi mufwè kùkaadi bidimu makùmi àsàtù nè bisàtù. Ewu n’Kilistò udi nè mwoyi munda mwànyi.

²²¹ Kàdi mèmè mutàngile kwàka nè mumumòne wènza bintu bìdi kabiyi bîmpè, bibi, dîbà adi ndi mmanyà nè kacya ncitukù mufwè to; William Branham ùcidi ànu nè mwoyi; wèwè ucidi ànu nè mwoyi. Paùcidi ànu ushìkukila mèyi Èndè matùma, dîbà adi ucidi ànu nè mwoyi. Kàdi paùdi utùmikila dîyi Dyèndè ditùma nè: “Nwènù baNngàngè, lamàayi mèyi Àanyi.”

²²² Bilenga kaayi’s wè, bwà kwela meeji nè Yèyè wàkalaya cyôci eci’s! “Mu katanci kakesè, nè bàà pa buloba kabàakuMmòna kàbidi to. Bàà pa buloba kabàakuMmòna to, kàdi nwènù nenùMmònè.” Kaa! “Mwaba wònsò wùdi bàbidi anyi bàsàtù badisangishe, Mèmè nêngiikalè munkaci mwàbò.” Ndi mvùluka aci. Udi mvùluke aci anyi, mwanèètù? [Bànà bèètù abu bàdi bàmba nè: “Amen.”—Muf.]

223 “Nè byenzedi bîNdi ngèza, bòbò pààbò nebàbyenzè.” Mbyenzedi byà mùshindù kaayi byàkenzàYe? Ki bwalu mbwòbù abu’s. Nwamònu anyi?

224 “Kaa, èè, mu bushùwà bwà bwalu, mpindyewu, Mwanèètù Branham, aci cìvwa mbwà ditùkù dikwàbò. Kì—kì ng’aci to.”

225 Ndi mvùluka nè ke cyàkambàYe aci’s. Ncyèna mvùluka ciwãmbi wèwè aci to. Aci nciyè cyònsò, nwamònu’s, kàdi ndi mvùluka cyàkambàye Yèyè. Nwamònu anyi? “Ewu wãNdona neàdìpidyè,” kupidya meeji èndè yèyè mwine, kupidya ngeelèlù wendè wa meeji sungasunga. Udi mufwànyine kupidya tatwèbè, mamwèbè, mukàjèèbè, bàna bèèbè; kàdi kùdi cintu kampàndà cilelèlè menemene mu mùshindù wà kùyì mwà kupidya Aci to. Cidi cikulama. Nè Yèyè ùdi kaaba aka.

226 Mpindyewu tùvùlukàayi ànu mulayi wònsò wàkenzàYe, patùdì twinyika mitù yètù apa.

227 Taatù wetù wa mu Dyulu, kùvwa malòmba àbùngì ànu katanci kakesè aka. Byanza byela muulu kajuukilabì mu nzùbu mujimà emu. Kàdi, Taatù, Wèwè ngudi Nzambi udi nè mwoyi. Nènkù ndi nKulòmba, Mukalenge Yesù, bwà kubèneshakù bantu aba. Swàkù bwà Nyumà Mwimpè Webè àsombelè pambidi pààbò, àbàpèèshèku Mwoyi wà Cyendèlèlè, àbàpèèshèku cidìbo naaci dijinga aci.

228 Tùvùlukàku nè, Wèwè ngudi mwenze mulayi. Wèwè ngudi mwambule bujitu bwà mulayi ewu. Tùvùlukàku nè, cìdi muntu mukwàbò kanà yònsò wamba nànsha ciikàle cinyi, Wèwè ke Yèyè awu. Wèwè ke Utùdì bindile, bwà kuuja mulayi Wèbè. Wèwè ke Wakamba, nè: “Ewu udi ungiitabuuja Mèmè, nànsha byòbì nè mmufwè kàdi neikalè nè mwoyi. Ewu yònsò udi nè mwoyi nè ungiitabuuja Mèmè kàadyàkufwàku to.” Ndi mvùluka nè Wèwè wàkamba aci, Mukalenge.

229 Nè pashìshe Wèwè wàkamba nè, aba bààkaKwitabuuja. . . Mpindyewu, Wèwè wàkamba nè, twètù biitabùùje, tuvwa bapetè Mwoyi wà Cyendèlèlè. Nè Wèwè wakamba nè, aba bàdì bàKwitabuuja, byenzedi byÙdì mwenze bòbò mbafwànyine kubyènza kàbidi.

230 Mpindyewu, Taatù, tudi bamanyè nè Wèwè udi Nzambi, nè tudi bamanyè nè kakwèna mukwàbò nànsha umwe to pa kuumusha Wèwè. Nè tudi tuKwitabuuja, nè tudi baKweyèmène mpindyewu, mu Dìna dyà Yesù Kilistò.

Mpindyewu, nè mitù yènù miinyika.

231 Mbanganyì mu nzùbu emu bàdì bamanyè nè kanwèna nuvùluka Mukalenge wenù mu mùshindù wùvwàbì bikèngela bwà nwènù kuMuvùluka to? Nènkù ku ndekeelu kwà kaaDiyiisha kakesè, kakòsòlòke aka, udi muswè kwela byanza byèbè muulu wamba nè: “Nzambi, Dìvwijekù mulelèlè menemene kùndì too nè mungààKuvùlukà pa wanyì. . .Mèyi

Ndi mumanyè dîbà adi, Mwanèètù Branham nè, ncyèna mwà kwikala mujaalàme kàdi mwikàle nè njiyà yà mùshindù awu to. Pa nàнку, ndi ngèèla cyanza cyànyì muulu kùdi Nzambi nè: ‘Ikàlàku naanyì luse.’” Elà cyanza cyèbè muulu. Ikàlà nè meeji matòke nè cyòci aci. Ncyà bushùwà. Nzambi àkubènèshè. Ncyà bushùwà. Èyowà’s, mukalenge. Mukalenge àkubènèshè. Amen.

²³⁷ Ndi ànu mwindile cyanààna, bwà kumòna Nyumà Mwîmpè ní mmufwànyine kubuulula cintu kampàndà cikwàbò. Nzambi àkubènèshè mukalenge. Nzambi àkubènèshè. Bushùwà’s. Ndi muswè ànu bwà Yéyè kukenketa mwoyi wèbè. Ke cidiYe mulwile kaaba aka ncyòci aci. Èyo. Nzambi àkubènèshè, inàbànzà mutekète. Abi’s mbilenga be.

Ànu munùdi nucyèlela meeji amu, cyangàtaayi nè dîsù dikolè mpindyewu.

²³⁸ “Kaa, Mwanèètù Branham, bikèngela mèmè—mèmè ndwijakajè nye kumbèlu.” Tèèlejàayi. Newùlwijakajè bwà kupàtuka mu mwoyi ewu, dîngà ditùkù, kàbidì. Wamònu anyi? Elàngànaayipu meeji mpindyewu. Ke dîbà ndyòdi edi. Eci ke cikondo.

²³⁹ Wèwè udi wamba nè: “Èè, ndi nkwabwila’s. Mpaasàtà wetù, yèyè’s—yèyè’s mmuntu wa meeji matwè, mulongè tùlaasà twà dikèma. Mbipìciibwe nè mèmè mucitèèlejile kùdi. . .”

²⁴⁰ Kacyèna nè cìdici cìshintulula to udi utwàla Mukenji nànsha yèyè nganyì. Kî—kî mmùsànjeelà awu to. M’Mukenji wùdi utèèleja. Nwamònu anyi? Nànsha bàmba nè mmuntu wa mùshindù kaayi udi mufwànyine kubwela mu ciibi mwàmwa nè—nè kukupèèsha mukenji bwà nè—bwà nè wèwè—wèwè udi mupyàne mùliyò wà ndola, udi mufwànyine kwitaba mfrangà—ayi. Itàbà difwidiibwa dyèbè dyà luse.

²⁴¹ Nè mitù yènù miinyika mpindyewu, nè mèsù ènù mabwita, nènnùlòmbèku cintu kampàndà nè meeji matòke ònsò. Nènku ndi muswè bwà nùngambilè bulelèlè.

²⁴² Nwènù bakàji, bàdi nè nsukì mîpì abu, mbanganyi bàdiku bàdyùmwa bulelèlè nè bivwa bikèngela nwènù kwikala nè nsukì mile? Elà cyanza cyèbè muulu wamba. . . Nzambi àkubènèshè. Abi’s mbîmpè. Ndi mumanyè nè udi mwenzè nàнку. Ndi—ndi. . . Kùdi ditèkemena bwèbè wèwè. Kàdi paùdi mutàmbe kupapisha mwoyi, mu mùshindù wà kùyì mwà kucyènza to, kwèna nànsha udyùmwa mupiiishiibwe to, nwamònu’s, dîbà adi kùdi cintu kampàndà cikwenzèkèle. Bwalu, Diyì ndyambè nè bivwa bikèngela bwà wèwè kwenza nàнку.

²⁴³ Mbanganyi, nwènù bakàji, bàdi bàlwàta tupùütulu nè bilàmbà abi, anyi nunwà mfwankà; nè—nè nwènù balùme, kàbidì, bàdi bamanyè nè nudi nwenza bibi abu? Nè nwamba nè: “Ncyèna muswè kwenza nàнку to, Mwanèètù Branham. Ncyà bushùwà nè ndi munangè Nzambi, kàdi cintu aci—aci cidi ànu cindamàte. Nènku ndi mumanyè nè ncintu cibi. Nèngèlè

cyanza cyànyì muulu. Mu—mu dyela dyà cyanza cyànyì muulu, ndi ndòmba bwà Nzambi àcinguumùshèku.” Ela cyanza muulu. Ikàlà nè meeji matòòke. Nzambi àkubènèshè. Ncyà bushùwà. Èyowà. Ncyà bushùwà.

²⁴⁴ Aci’s mmeji matòòke. Aci’s ncyà meeji matòòke. Nzambi neàtùpèeshè disangisha dyà dyondopa mu katanci kakesè emu, bwà meeji matòòke awu. Tudi mwà kwitabuuja aci. Ikàlaayi nè diitabuuja mu Nzambi.

²⁴⁵ Taatù wa mu Dyulu, Udi mumòne byanza. Udi mumanyè ngiikàdilù yà bantu. Wèwè udi mumanyè cyònsò cidi mu myoyi yàbò, Mukalenge. Ndi ndòmba bwà Ûfwilèku muntu nè muntu wa kùdibo luse. Nènku, mpindyewu, bàpèèshèku dijinga dyà mwoyi wàbò. Nyungishà myoyi yàbò. Enzàku nàнку, Mukalenge, bwà cidibo naaci dijinga bwà kumanya aci. Ndi ndòmba bwà Ûbàpèèshèci, mu Dîna dyà Mwan’Èbè munanga, Mukalenge wetù Yesù. Tudi tulòmba nùнку bwà butùmbì bwà Nzambi. Ndi mbàlàmbula Kùdì, Taatù Nzambi, bwà Wèwè kwenza mudimu Wèbè munda mwàbò, mu Dîna dyà Yesù Kilstò. Amen.

²⁴⁶ Mpindyewu, panùdì nubàndisha mutù apu, mbanganyi bàdiku buumvwe dishiilangana dyàbùngì pa bwalu abu? Èlà ànu cyanza muulu cyanààna, wamba nè: “Ndi ndyùmvwa bishiilàngàne bikolè.” Mpindyewu, mbanganyi bàdì bamanyè nè Yèyè wàkalaya nè Yèyè—Yèyè ùdì “Mukalenge ùdì wòndopa màsaamà ètù ònsò”? Nudi nwitabuuja nàнку anyi? Nudi mwà kwitabuuja anyi?

²⁴⁷ Mbanganyi bàà kunùdì bàdì biitabuuja nè Yèyè wàkalaya cyòci eci, nè: “Katanci kakesè bàà pa buloba kabààkuMmòna kàbìdì to, kàdì nwènù nenùMmònè”? Nudi nwitabuuja nàнку anyi? [Disangisha didi dyàmba nè: “Amen.”—Muf.] Nudi nwitabuuja nè bìdì mwà kwenzeka dîbà adi, piikalà Ebèlù 13.8 ewu mwambe nè: “Yesù Kilstò, umwèumwè awu makèèlèlè too nè kashidi,” nudi nwitabuuja nè bìdì mwà kwenzeka bwà twètù kumòna Nzambi anyi? [“Amen.”] Mmunyi mutùdiku bafwànyine kuMumòna? Mu dimwèneshiibwa dyà Nyumà Wendè, Buumùntù Bwèndè bùdì nè mwoyi. Nudikù bafwànyine kwitabuuja aci anyi? [“Amen.”]

²⁴⁸ Nèndombèku bàna bèètù bwà kabàsambididi bwalu ebu paanyimà pààpa to, nsambidilaayi ànu mèmè. Batèèleji bòbò, ewu musangu. . . Netwikalè nè disangisha mu matùkù makesè emu, nènku pàmwàpa netùbàpetè.

²⁴⁹ Ndi muswè bwà batèèleji aba biikale mu bukòntononyi bùmwèpelè. Ndi muswè kwangata nyumà eyi mu bukòntononyi bwànyì, mu Dîna dyà Yesù Kilstò, bwà butùmbì Bwèndè, bwà Nyumà Wendè wàmòna mwà kukwàta mudimu nè kunùjaadikila nè Yèyè ùcidi ànu nè mwoyi.

²⁵⁰ Ndi ngàngata Dîyi Dyèndè kaaba aka. Mbambè nè, Yone Munsantu, Yone Munsantu nshapità wa 14 ku mvensà wa 12,

mmwambè nè: “Ewu udi ungiitabuuja Mémè, byenzi bîNdi ngenza yèyè neàbyènzè pèndè.” Nudi nwitabuuja nàнку anyi? [Disangisha didi dyàmba nè: “Amen.”—Muf.]

²⁵¹ Dìbà adi, yònsò wa kunùdi nwènu bàdi kuntwaku, bàdi bàsaamà anyi mu lukèngelu lwà bintu abu, anyi biikàle nè dikèngela dyà cintu kampàndà, nùsambilaayi. Lenga wèwè ànu cyanààna, vùlukà’s, cizemba cyà civwàlù Cyèndè. “Yèyè m’Mwakwidi Munène udi mwà kulengiibwa kùdi dyumvwa dyà mateketa ètù.”

²⁵² Bible ùdi wàmba nàнку anyi, bânà bèètù? [Bânà bèètù abu bàdi bàmba nè: “Amen.”—Muf.]

²⁵³ Nè pashiishe mmunyi mùvwàYe mufwànyine kwenza maalu, bu nè Yèyè ùvwa Mwakwidi Munène? Mùshindù wùm wèwèwùm wè wàkenzàYe pàvwàYe pànwapa awu, bwalu Yèyè ùdi Mwakwidi Munène umweumwe awu. Mmunyi mùvwàYe mufwànyine kucyènza? Pàdi mubidi Wèndè Mulàmbù pa Nkwasa wa butùmbi wa Nzambi, mmunyi mùdiYe mufwànyine kucyènza? Wàkaaluja Nyumà Wèndè, Nyumà Mwìmpè. “Nè Yèyè neàngatè maalu àdi Àanyi awu, nè neànùleejèwu.” Mpindyewu, wèwè muswè kumòna Nzambi ní. . .

²⁵⁴ Cìdi cyenza nè nshìndamijilè eci pa cyòci eci, mumanyè eci nè, ndi mumanyè nè Mukenji wùndi nyiisha bantu m’Bulelèlà. Ndi—ndi—ndi ngiitabuuja nàнку nè mwoyi wànyì wònsò. Nànsha nàнку, Didi dikòsa *apa*, ndambù mu mùshindù *awu*; kabiyi bwà kwikala nè lonji to, kabiyi bwà kupangakanangana to, kàdi bwà kwikala nè meeji matòòke. Nènku, ki bwà cinyi, ndi mumanyè nè Yèyè ngudi mwambè nàнку. Bu Yèyè mwà kwangata bintu bìvwà byà kùdi Nzambi. . . Nè bìvwà bikèngela bwà eci cinùmanyishèci. PùikalàYe wàngata bintu byà Kilistò, nè ùnùleejabì, nè ùnùleeja bintu bìcilwalwà, nè kwenza byenzi mene byàkenzàYe abi, s’ki Nyumà Mwìmpè awu. Ke cìdi nè cyà kwikalakù.

²⁵⁵ Sambilaayi mpindyewu, nè lengàayi civwàlù Cyèndè. Mémè nèndilekèlèlè kùdiYe, nè kumòna ciikalàYe mwà kunwàmabila. Sambilaayi ànu cyanààna.

²⁵⁶ Kùdikù bàmwè mwab’ewu bàtù kacya kabàyikù banji kubwela mu masangisha kwònsò eku anyi? Nudikù mwà kwela cyanza muulu anyi? Eyowà, bàdikù bààbùngì.

²⁵⁷ Vùlukàayi nè, Yesù Kilistò kacya musangu nànsha wùm wè kàtu mwànji kwamba nè ùtu òndopa bantu to. Yèyè wàkamba nè: “Kì m’Mémè udi wenza byenzi to. N’Taatu Wanyi,” nè mu Yone Munsantu, nshapità mwi5 ku mvensà wa 19.

²⁵⁸ PààkapiçilàYe ku ciina cyà màyi cyà Bètesdà, nè mwómò amu mùvwà misùmbà minène, yà bantu bààbùngì, pàmwàpa binunu byà bantu balààdika mwaba awu, balèmà, mpofo, bilèmendà, bakònyàngàle bidimba, Wàkaya kùdi muntu uvwa pàmwàpa nè disaamà dyà mpàci wa mènyi, anyi ùvwa mufwànyine kwikala

nè disaamà dyà cyádi. Dìvwa dinènge, ùvwa naadi munda mwà bidimu makùmi àsàtù nè mwandamukùlù. Ke kumwambilaYè nè: “Ambùlà kalààlù kèèbè aku ùye kwèbè kumbèlu.”

259 Muntu awu ùvwa mwà kwenda. Wàkamba nè: “Pàndi mpwekakù, muntu mukwàbò. . .” Kàdi kùvwa bantu mwaba awu mu ngiikàdìlù mutàmbe kubìipa kupita mùvwàye yèyè.

260 Kàdi Yesù ùvwa mumanyè nè yèyè awu ùvwa mwaba awu, nè mumanyè nè yèyè ùvwa mu ngiikàdìlù awu. PààkaMukonkàbo, Wàkamba nè: “Bulelèlà, Ndi nnwàmbila nè, Mwànà kèna mwà kwenza cintu nànsha cìmwè mu Yèyè mwinè to. Kàdi cidìYe ùmòna Taatù wènza aci, ke cidì Mwànà wènza mwomùmwe.”

261 Ke ngiimànyìnù Wèndè umwèumwè awu leelù ewu. Kakùtu mupròfetà nànsha umwe, muntu nànsha umwe kàtukù mwànji kukùmbana bwà kwenza cintu nànsha cìmwè to pa kuumusha budishikaminyi bwà diswa dyà Nzambi, ncyà bushùwà, cìikalà Nzambi mwà kwenza aci.

262 Ncyèna mumanyè to. Ndi muswè nè, bu. . . Ke bwà cinyi. Ndi mumanyè musùmbà wà bambi bàdi basòmbe apa aba. Kakwèna bààbùngi bapite kuntu kwàka bàndi mumanyè to. Bu mèmè mwà kuMumòna pa muntu kampàndà, ndi mufwànyine kuteeta, bu mèmè mwà kuswà, ndi ngàmbara bantu nè mvwa mubàmanyè.

263 Sambilaayi, kàdi nùmònèbi ní Ùcidi ànu Mwakwidi Munène udi mwà kulengiibwa awu. Aci’s ncifwànyine kuMutèèka ànu kaaba aka kumpàlà kwètù eku, nènku nenúfwànyine kumòna nè Yèyè ùdi kaaba aka. Ncyà bushùwà anyi? Ambàayi nè: “Amen.” [Disangisha didi dyàmbara nè: “Amen.”—Muf.] Ncifwànyine bushùwà kuMuvwija kaaba aka. Ikàla wèwè ànu nè diitabuuja.

264 Inábànzà mutekète nyèyè ewu musòmbe mwab’ewu nè mutù wèndè mwela muulu, ùsambila nè mwèndè mwònsò. Yèyè mmulwàte nkooci wa màyi à matàmbara, musòmbe mwaba wàwa. Ùdi munkaci mwà kusambila bwà lutàtù lùdi mu mutù wèndè. Bwà nè yèyè. . . Cidi cìmutàcisha. Ncyà bushùwà anyi, inábànzà? Elà cyanza cyèbè muulu piikalàbi nè ncyà bushùwà. Piikalàbi nè ndi mwenyi kùdi, kupa cyanza cyèbè kumpàlà nè paanyimà. Cyàkuumùkù mpindyewu.

265 Ambà tǔng, udikù mwà kungaanyishila paùdimu apu anyi? Bukènkè abu mbutentèmùke buyè pa inábànzà udi musòmbe ku luseke lwèbè aku awu. Ùdi munkaci mwà kusambila pèndè. Ndi muswè nnùkonkèku cintu kampàndà. Wèwè wambi nè: “Wamvùlukakù, Mukalenge.” Èyo, Yèyè wàkuvùluki. Udi usaama disaamà dyà mutù wà kapàla. Aci ní ncyà bushùwà, elà cyanza cyèbè muulu, unyukushè cyanza cyèbè. Èyo. Ki bwalu mbwòbù abu’s. Nwamònu anyi?

266 Nudi nwitabuuja anyi? Mpindyewu: “Katanci kakesè bàà pa buloba kabàakuMumòna kàbìdi to.” Konkàayi bakàji abu. Nudi babàmòne. Bàkonkaayi ní ndi mubàmanyè.

267 Mwab'ewu, ke nsongàalùmè ewu musòmbe kaaba aka, ùsambidila tatwèndè. Kacya ncitukù mwànji kukumanya to. Ncyèna mumanyè nè wèwè udi nganyi to. To. Ncyèna mumanyè kantu nànsha kàmwè pa bwalu bwèbè to. Kàdi udi munkaci mwà kusambidila tatwèbè. Kèna apa to. Ùdi dyàmwàmwà dyà mâyi manène mwaba kampàndà. Ùdi ùsaama disaamà dyà cifu. Ùdi mu Puerto Rico. Aci's ng'EMU MMÙDÌ MUKALENGE WÀMBA. Ncyà bushùwà. Udi witabuuja.

Nudi bumvwe cìndi muswè kwamba aci anyi?

268 Inábànzà nyéyè ewu musòmbe mwab'ewu, ùmwèka mulengìbwe, nè cifulu cikunze kumutu. Mandamu Aldridge, Aldridge. Uh-huh. Èyowà. Ùdi ùsaama disaamà dyà mwoyi. Udi witabuuja nè Nzambi neàkwondòpè anyi? Èyo.

269 Udi ungenzelakù dyèsè anyi? Kùdi inábànzà musòmbe mulondèle mwaba awu, dyèndè nè Mandamu Cook. Mandamu Cook ùdi nè mikòlò yìsaama. Ncyà bushùwà. Màndàmù Cook, elà cyanza cyèbè muulu. Mémè mwikàle mwenyi ànu wa menemene ewu, elà cyanza cyèbè muulu. Èyo. Ikàlà nè diitabuuja kùdi Nzambi.

270 Tentèkèla mukàji udi ku luseke lwèndè awu cyanza. Yèyè m'Màndàmwànzele Russell. Ùdi ùsaama disaamà dyà bisùlùsùlù. Elà cyanza cyèbè muulu, Màndèmwàzèlè Russell, nè ùcìtábùùjè nè mwoyi wèbè wònsò, mémè mwikàle mwenyi kùdi.

271 Kàdi bìshi bwà udi ulonda? Èyowà. Cintu cìmwèpelè cìdi cìkèngela wèwè kwikala naaci ndiitabuuja.

272 Inábànzà udi ku luseke lwèndè awu ùdi ùsaama disaamà dyà cifu, yèyè pèndè, nè dìnà dyèndè m'Màndàmù Dillman. Wèwè mwitábùùjè nè mwoyi wèbè wònsò, udi mwà kwikala nànkù.

273 Màndàmù Harmon, udi musòmbe ku luseke lwèndè awu, mmufùme ku lùpitaadi. Mmupetè di—dìpandiibwa bwà disaamà dyà—dyà ciseesukidi. Udi witabuuja anyi, Mandamu Harmon? Wèwè mwitabuuje nè mwoyi wèbè wònsò, udi mwà kwalukila kwèbè kumbèlu, kuumvwa bimpè.

274 Mbanganyi bàdi bìitabuuja mpindyewu?

275 “Katanci kakesè aka bàà pa buloba kabààkuMmòna kàbidì to.” . . . ? . . . Cìndi nteeta kwamba ncinyi? Vùlukàayi nè, Yesù ngwakalaya. Yesù wàkamba nè: “Néngiikalè neenù, munda mwènù mene, too nè ku ndekeelu kwà buloba. Byenzedi bìNdì ngèenza nenùbyènzè pèènù.” Kuvùluka nè Yesù wàkalaya bintu ebi, Yesù ùdi ùbifikisha ku dyanzeka.

276 Mpindyewu, kàbidì, vùlukàayi nè Yesù wàkalaya, nè: “Ewu udi ungiitabuuja Mémè ùdi nè Mwoyi wà kashidi.” Nwènù bàvwà beelè cyanza cyènù muulu, katanci aka abu, paanyimà pàà mudimu wà dyondopa ewu nudikù mwà kubànda kùneeku mpindyewu nè kwimana kaaba aka bwà disambila anyi? Yèyè

wàkalaya bwà kufila Mwoyi wà Cyendèlèlèlè ànu mwàkalayàye bwà dyondopa amu.

²⁷⁷ Mpindyewu, nuwvakù bamanyè nè Yèyè wàkalaya cyôci eci kàbìdì anyì? “Bimanyinu ebi nebifilè aba bàdì biitabuujà. Bòbò batentèkèlè babèèdì byanza babèèdì nebàsangalè.” Nudi nwiitabuuja nànkù anyì? Mpindyewu tentèkèlàngànaayi byanza muntu nè mukwèndè dîbà adi. Nwamònu’s, Yèyè ùdì kaaba aka. Ncyèna mwà kunwòndopa to. Ùkaadi mumanè kucyènza. Mpindyewu tentèkèlè muntu kampàndà byanza, nè ùsambidilè muntu kampàndà, ànu udi ku luseke lwèbè awu. Amen.

²⁷⁸ Mpindyewu inyikaayi mitù yènu nè nusambile ànu munùtù nusambila mu èkèleeziyà wenù amu. Sambilà nè: “Mukalenge Nzambi, ondòpàku muntu ewu. Muntu ewu ùdì munkaci mwà kunsambidila.” Nènku lombaaayi ànu Nzambi bwà kwondopa nè kusàngaja. Cítàbùùjè nè mwoyi wèbè wònsò. “Mukalenge, ndi ngiitabuuja nè Yesù Kilistò, ùdì umweumwe awu makèlèlè, leelù, too nè kashidi.” Dìyì Dyèndè kadyèna mwà kupangilakù to.

²⁷⁹ Vùlukàayi, Yèyè wàkalaya nè: “Katanci kakesè bàà pa buloba kabààkuMmòna to.” Kabèèna bàMumòna mu mbilu yà mbwa dilòòlò edi to. Kabèèna bàMumòna mu sèndèmâ to. Kabèèna bàMumòna mu èkèleeziyà yà kwisùkwisù eyi to. Kàdì nudi nuMumòna. N’yèyè ewu kaaba aka. Vùlukàayi nè, Yèyè ngudi mucilayè, nè Yèyè ùdì kaaba aka bwà kwandamuna ku disambila dyèbè nè kukupèèsha dijinga dyà mwoyi wèbè.

Tentèkèlàngànaayi byanza muntu nè mukwèndè nè sambilaayi.

²⁸⁰ Mukalenge Yesù, ndi mulwè, mwikàle mvùluka nè Wèwè wakamba nè: “Mu Dìnà Dyànyì bòbò nebiiipatè baadémons.” Nè ndi ngiipata nyumà yònsò wa bupidyà kule nè batèeleji aba, kule nè bantu aba, bwà butùmbi bwà Nzambi. 🐘

63-0122 Kuvùluka Mukalenge
Southside Assembly Of God
Phoenix, Arizona États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org